

底之行不倚中行。是為行法。諸法若住若無所住。吾我之法處所自然。其處非處。清淨法處。一切法處皆無有處。空無之處。究本末處。至竟無處。一切諸法無動無著。不可盡極。亦無所有。亦無所行。亦無輕戲。亦無所依。亦無不依。亦無所住。亦無所受。其於是法。曉了慧者。慧無所念。是曰諦。真諦無本。則法之慧。設使寶女菩薩如是。曉了諸法。遊在生死。開化眾生。亦不違失滅度之法。斯為菩薩等造法行。世尊說此行法之時。八千菩薩逮得法忍。

### 不退轉品第十一

於時寶女即以十億百千貴價珠瓔貢上大聖。口宣斯言。唯然世尊。其有菩薩遵修奉順此法行者。則具佛法悉能普備。如茲受決處佛道場。降伏眾魔怨敵之讎。以不退轉印而印之。當造斯觀。時舍利弗謂寶女曰。汝豈能知諸菩薩行不退轉印所可印乎。於時寶女答舍利弗。以偈頌曰

人界及法界

審諦解平等 了斯無二際 則不退轉印  
其過去諸佛 當來并現在 法界皆平等  
逮成不退轉 諸所有境界 并無為之界  
寂寞轉空議 覺成不退轉 本際無崖底  
不得其邊畔 一時等能解 覺了不退轉  
其有方俗法 如行之所趣 智慧觀平夷  
覺了不退轉 如魔之境界 佛界則平等  
相應為一類 以是印見印 其姪怒癡者  
欲塵不可限 覺了諸想著 達解不退轉  
生死及無為 道教則寂然 等解於滅度  
覺了不退轉 五陰道如之 有二分別慧

猶如幻貌像 明哲無思想 計於四種者  
猶如虛空界 曉了無可取 真印而見印  
覺眼則為道 解空無所著 若眼道如之  
以等上平等 諸入皆如是 道空常平均  
當作是了知 以此印見印 眾生之所念  
一心悉知之 則無所罣礙 斯故不退轉  
一切群萌根 卑劣妙中間 于彼度無極  
逮成不退轉 辯才無罣礙 無斷無所住  
億劫中誦說 其法不可盡 虛空尚可盡  
風可尚執持 彼明辯才慧 則不可盡極  
總持行如斯 攬攝一切法 名德不違心  
不失于博聞 其十方諸佛 導師所說法  
皆得于總持 慧心念不忘 於過去千劫  
所聞大聖法 諮問真諦教 善學於總持  
斯等總持然 辯才亦如之 智慧及諸根  
逮成不退轉 以空印諸法 無著無所拔  
以印印於空 故曰不退轉 虛空印諸法  
清淨無所有 曉了此本際 以印不退轉  
諸因緣法無 因緣其惟行 因緣則非真  
諦相一切法 諸法相猶幻 猶如虛空相  
以是相印之 印於不退轉 一切眾生行  
色聲之禮節 一時普能現 覺了不退轉  
於施捨無量 功德常無盡 供養虛空界  
至誠命為一 禁戒高無極 懷來致佛戒  
無限無有量 等遊若虛空 一切眾生禁  
學不學緣覺 及不退轉戒 十六分無倫  
忍辱悉盡極 遵修無所生 成就此忍辱  
逮成不退轉 精進無限量 方便不可極  
悅可群萌類 精進為大仙 常為專志定

無亂善謹慎 普見一切法 無諍定三昧  
逮無礙智慧 淨除所覩處 得佛之尊行  
淨土令成就 慧飛度無極 善學於善權  
以佛印見印 遵修于道行 其行不可知  
志性何所療 積行無邊際 開化于眾生  
諸聲聞緣覺 一切魔異學 終不能及知  
大人之所行 彼不著諸行 感動神足定  
解空無所有 皆講逮所興 來過而出生  
示現佛形像 坐於佛樹下 則轉于法輪  
普現諸國土 面見十方佛 譬若如日月  
等遊于虛空 示現取滅度 隨大信樂乘  
不違示斯印 其印不退轉 無限如虛空  
智慧普若斯 不退轉之法 曉了道如斯  
於是寶女說此頌已不退轉印時。三千大千世界為大震動。五千菩薩得不退轉受別之印。世尊則讚彼寶女曰。善哉善哉。快說斯言。能演菩薩不退轉印。

大乘品第十一  
於是賢者須菩提白世尊曰。唯然大聖。如今斯女不退轉印而見印矣。不復疑也。乃能有斯如此像類。上妙辯才也。設不爾者。無緣講說若茲深法。佛言。如是。須菩提。誠如所云。如斯寶女不退轉印而見印矣。以逮法忍乃得入斯大乘之行。於時寶女前問佛言。所云大乘為何謂乎。佛告寶女。所謂大乘弘廣之乘。慰撫一切眾生之類。故無有陰蓋。示現一切眾德異慧。故離垢之乘。捨諸塵勞。窈冥事故。普照之乘。一切所解脫門相。故顯曜之乘。無欲著故。隨因緣乘。脫所罣礙。故清淨之乘。護

戒品故等善住乘而諦慎護定品之故無漏之乘選慧品故解脫乘者照解品故等現一切諸法乘者曉了度知見品之故不進退乘者攝十力故無懼乘者四無所畏師子吼故無所往至離處乘者攝受諸佛十八不共殊勝法故普平乘者等行慈心加眾生故無害乘者則以正法抑制一切諸外學故消除乘者降伏一切魔官屬故寂滅乘者壞塵勞故降化乘者伏陰魔故離限乘者越死魔故殊勝乘者棄天魔故豪富乘者則能具足施度無極故無熱乘者戒度無極則具足故棄怨乘者忍度無極則具足故堅無壞乘者進度無極則具足故斷除一切諸所自在瑕玼之乘者心離陰蓋故所修乘者寂度無極則具足故一切善德一切智慧世俗之事度世之法所遭乘者智度無極則具足故普御隨行一切乘者權度無極則具足故至無至乘趣滅度故歸安乘者建八路故其所至到無處乘者遵修奉行觀寂之故根力覺意具志乘者一切諸魔及諸異學無瞻顏故四神足乘則能普現諸佛國故等能超度正諦住乘蠲除一切諸不善法遵修眾行德善法故善修謹慎意止乘者無內怨故假使不著三界乘者奉無漏故不著有為諸界乘者逮得無為顯曜界故不捨道心御善住乘者不樂一切聲聞緣覺所行慧故超越乘者則能施以無見頂故莊嚴乘者功德成故選擇眾生志性乘者究竟慧故闍門乘者所可詞祀無所逆故一味乘者等佛慧故洪音乘者十方聞故

一切諸天普禮乘者善修業故釋梵四王所歎乘者德無量故其有慳貪能施乘者為元首故若有犯禁施慧戒乘者謂大乘故志懷瞋怒施忍乘者不加害心於眾生故其懈怠者施精進乘被堅固鎧未曾捨故其亂心者施禪定乘令心調定業仁賢故其邪智者施正慧乘博聞解故慧施眾安除苦患乘不造一切眾惡之故佛之聖道無罣礙智無等倫慧所示現者皆處一切諸乘頂故以是之故為大乘也佛講說此大乘議時萬二千人發無上正真道意口說斯言吾等亦當乘斯大乘令無數人眾生之類皆使得立於此大乘於是寶女白世尊曰唯然大聖其大乘者有何塹路而不疾歸諸通之慧佛告寶女行大乘者有三十二罣礙塹路以此塹故不疾得成諸通之慧何謂三十二樂聲聞乘一志緣覺乘二求釋梵處三倚著所生淨修梵行四專一德本言是我所五若得財寶慳貪愛恪六以偏黨心而施眾生七輕易戒禁八不念道心專精之行九瞋恚之事以為名聞十其心廢逸十一而心馳騁十二不求博聞十三不察所造十四貢高自大十五不能清淨身心行十六不護正法十七背捨師恩十八棄捨四恩十九離堅要法二十習諸惡友二十一隨諸陰種二十二不勸助道二十三念不善本二十四所發道意無權方便二十五不以殷勤咨嗟三寶二十六憎諸菩薩二十七所未聞法聞之誹謗二十八不覺魔事二十九習恃俗典三十不肯勸化於眾生類三十一厭於生死三十二是為三十二事違失大乘墮于塹路其墮塹路不能疾成諸通之慧又

復寶女其學大乘之威神德以此之乘墮于塹路所以者何其於斯乘有為之穢不如所乘為大乘者則墮塹路若以於彼無為之德如斯行乘為大乘者名聞之德計於彼乘於如來心即為塵勞一切不順於斯大乘悉墮塹路其於斯乘著如來覺德稱之故如是乘者大乘之德故墮塹路是故寶女菩薩大乘當棄塵勞所慕法乘以斯之法致淨大乘當習此法思惟奉行合斯恢弘何所是法淨致大乘有三十二法致淨大乘何謂三十二於諸眾生無請之友故真諦究竟為他人故志性堅強遵修眾德行不以厭至德成故心無憤亂志性淨故其身清淨威儀禮節無想念故口言清淨言行相副故其心清淨不捨道心故布施清淨不望報故戒行鮮潔護犯禁故忍清淨者不惜身命故精進清淨十力無畏具足故禪定清淨一切塵勞無雜錯故智慧清淨蠲除一切罣礙之故清淨心者降伏一切眾魔之故堅固行者度諸願故習諸四恩不捨眾生故於佛反覆護正法故以不懈倦則能具足道品法故所聞無厭具聖智故其歡喜者轉加勝故無慢善聖以能致到無見頂故於一切法無諍訟者因緣報應所見和故無貧匱者獲七財故所以不貧由自在故德慧成就不失通故滅除眾生之塵勞者定於寂然成就之故如來慧解所變化者具足觀故觀三脫門所示觀者遵修於空無想願故澹泊內者令諸眾生覺了分別寂然慧故興盡慧者不起法忍故修行一切諸法要

①乘者 ②乘正 ③貧 ④宮僕 ⑤此同大集經6卷38頁上18:示一切法等無二故名解脫智攝十力故名無能動 ⑥慧惠 ⑦

者致受別故。佛言寶女，是為三十二法淨致大乘。說此三十二事法品典時，七萬二千年與人，皆發無上正真道意。萬二千菩薩不起法忍。天於虛空百萬之眾，諮嗟歎吒。雨於天華鼓諸伎樂，各各舉聲而歌頌曰：「其有逮聞於此大乘名德之稱，斯等眾生護持建立諸佛之德，其聞信樂篤信以後，若執持者審諦奉行，復超此功。」

### 囑累品第十二

於是天帝釋、梵忍跡天王、四大天王、白世尊曰：「至未曾有，天中之天，乃能善說深奧應議，講斯經典，多所導利，滅諸陰蓋及眾塵勞，化不順議，示導正義，以降魔怨，棄捐一切諸外異學，總攝一切諸佛之法，是故世尊，吾當受持於斯法典，誦講說，若諸法師攬受奉持此經卷，歸身手執，若在其舍書著竹帛，宣布遠近，諸天龍神及捷沓怛若信是經，欲奉持者，當令斯袖寬弘無役，其不悅樂而察陰蓋者，當令諦受，而使斯等不犯法師，不有所媿。於是世尊告天帝釋、梵忍跡天、四大天王、善哉善哉，諸仁者等，汝等乃欲將護法師，曉了志願，已能將護於法師者，諸仁者等則為擁護於正法矣。已能擁護於正法者，則為擁護一切群萌。爾時世尊告賢者阿難，汝當受此經卷之品，寶女所問正法之典，受持誦誦為他人說，假使菩薩於百千劫，而行布施忍辱者，設有菩薩取是經法，受則上口而誦誦者，為他人說，建立大哀，欲度眾生，具足大慈，思惟經法，立於忍辱，斯之獲德，出彼福上，速疾得歸於此。」

大乘賢者阿難白世尊曰：「吾尋奉受斯法典已，唯然大聖，斯之經法名曰何等？」云何奉行？佛告阿難，斯之經法名曰真諦，曉了義律，達門之品，當持，又名無量之德，發意所說，當持如來十力，四無所畏，十八不共，諸佛之法，分別諸相，菩薩應時遵修法行，說不退轉輪印，講演大乘，當奉持之，聚會之品，寶女所問，當奉持之，阿難，汝若能持此法門品，為他人說，便獲無量名德，諸法法之光曜，則為眾生建立佛事，所以者何？是為去來今現諸佛世尊究竟之法。佛說如是，寶女阿難，一切眾會諸天人民，阿須倫世間人，聞經莫不歡喜。」

### 寶女所問經卷第四

No. 400 [No. 397(5)]  
佛說海意菩薩所問淨印法門經卷第一

譯經三藏朝散大夫試鴻臚卿光祿  
大師賜紫沙門臣惟淨等奉 詔譯

如是我聞。一時世尊住於如來神通境界大寶莊嚴最勝道場，大菩薩宮中，而彼道場皆是如來威神建立，積集廣大勝福莊嚴，圓滿廣大福智妙行，現轉一切佛法勝報，顯示如來無邊神變加持之力，善入無礙境界大智一切見者，生大喜悅，入念慧行，普遍運行無動妙智，於無邊劫修集無量眾功德聚，而佛世尊現證諸法平等覺道，轉妙法輪，能善調伏無邊學眾，已於諸法得大自在，善知一切眾生心意及諸根性，已能到於最上彼岸，善斷一切種子習氣，得無發悟，佛身輕安，是時與大苾芻之眾六百八十萬人俱，皆住近心，

悉斷一切煩惱種習，皆是如來法王之子，能善出生諸無所得甚深法行，身相端嚴威儀圓備，作大福田，正智具足，復有無量無數不思議無等比，不可說不可說諸大菩薩摩訶薩，悉獲無所得菩薩智忍，已超菩薩灌頂之位，而能遊戲無加行位菩薩神通，得無盡陀羅尼，及諸菩薩陀羅尼門，於諸菩薩首楞嚴王三摩地中，而得自在，一切眾生歡喜樂見，已得菩薩諸無礙解，出生菩薩無發悟行，深心安住殊妙莊嚴，其名曰無盡藏菩薩摩訶薩，無量慧菩薩摩訶薩，無邊慧菩薩摩訶薩，無緣觀菩薩摩訶薩，常精進菩薩摩訶薩，精進慧菩薩摩訶薩，無斷辯才菩薩摩訶薩，無著無畏積菩薩摩訶薩，畢竟義慧菩薩摩訶薩，如是等無量無數不思議無等比，不可說不可說諸大菩薩摩訶薩，眾而共集會。

爾時世尊，以菩薩行位方便出生無障礙門，甚深正法，而用莊嚴諸菩薩道，成辦一切佛法，力無畏等真實智行，入一切法最上自在總持印門，入無礙解決定出生大神通智妙境界門，宣示一切不退轉輪，普攝諸乘住平等理，混入法界無分別性，隨諸眾生根性意樂，開示演說，隨知真實決定正法，破諸魔境，以深固法理，止息一切煩惱見等，入無著慧，宣說普遍廣大迴向善方便智，入一切佛平等性智，以無著加持法門，如實決定宣說諸法，於無分別非無分別，悉入平等，覺了甚深緣生之法，積集無量福智妙行，佛身語心平等莊嚴，隨知一切念慧行等無盡慧門，以四聖諦理

顯示聲聞乘法，以覺了身心智顯示緣覺乘法，以得一切智灌頂顯示大乘之法，入一切法自在理中，出生如來無邊功德，是故如來開示演說，施設表了，分別解釋，顯明宣暢。

爾時世尊將說如是廣大甚深決定法時，忽然於此三千大千世界之中大水充滿，猶如大海，下至地界，上至大寶莊嚴最勝道場，又如劫壞水災現時，一切三千大千世界大水充滿，下至水輪混如一海，今此大水亦復如是，然此三千大千世界，如是大水一切充滿，其中國土城邑聚落及諸人民，悉無所壞亦無障礙，及閻浮提諸四大洲，乃至大海須彌山等，欲界諸天一切宮殿，悉無少分損壞障礙，先現如是相已，後復於此大水之中，出現俱胝那庾多百千廣大蓮花，其花高顯瑠璃為莖，帝青為枝，閻浮檀金而為其葉，吉祥藏寶以為其鬚，馬瑙為臺，真珠交絡，一一花有無數俱胝多百千葉，其葉量廣一俱盧舍，是諸蓮花於大寶莊嚴最勝道場中，涌現虛空高一多羅樹，一切大眾坐蓮花上，於蓮花中隨其色相放大光明，是光普照十方無量阿僧祇佛刹，此諸光明廣照耀時，而此會中一切大眾歎未曾有，合掌恭敬咸作是言，今現如是希有瑞相，將非世尊說妙法邪？

爾時慈氏菩薩摩訶薩見是廣大神變事已，即於所坐蓮花臺上，偏袒右肩，右膝著地，合掌向佛恭敬頂禮，而白佛言，世尊，何故今時先現是相，而此三千大千世界之中，大水充滿混如一海，其中復現俱胝那庾多百千蓮

花高顯，世尊，昔所未聞，昔所未見，如是廣大希有神變，願佛為說，佛告慈氏菩薩言，慈氏當知，下方去此佛刹，過十佛刹，不可說俱胝那庾多百千微塵等數諸佛刹土，有世界名無量功德寶無垢殊妙莊嚴，彼土有佛，號海勝持慧遊戲出高神通，如來應供正等正覺，今現住彼說法教化，彼有菩薩名曰海意，與出過算數諸大菩薩摩訶薩眾，將同來此娑婆世界，瞻禮恭敬供養於我，又復於我所說法中而有所問，以是因緣先現瑞相。

爾時尊者舍利子白佛言，世尊，彼海意菩薩去此甚遠，何故世尊說彼菩薩能聞此會佛說法邪？佛言，舍利子，如汝今時，於我前聞所說正法，海意菩薩雖復住於彼世界中，而能聞我所說之法，亦復如是，舍利子，又如汝今現前觀我及諸大眾，彼海意菩薩能見我身及諸大眾，亦復如是，舍利子言，希有世尊，諸菩薩摩訶薩所有神通智力不可思議，而彼海意菩薩居于極遠刹中，能以無障礙眼見此色相，無障礙耳聞此音聲，世尊，若有聞是諸菩薩摩訶薩不可思議功德威神者，其誰不發阿耨多羅三藐三菩提心，尊者舍利子作是說時，二萬四千方天子皆發阿耨多羅三藐三菩提心。

爾時海意菩薩摩訶薩與彼出過算數諸大菩薩摩訶薩眾，恭敬圍繞，同時瞻仰彼佛世尊，海勝持慧遊戲出高神通如來已，即受教勅，承彼如來神足通力，及無加行菩薩已辦神通，於一念間，瞬目之頃，於彼世界隱伏身

相，即時於此娑婆世界大寶莊嚴最勝道場中，涌現虛空高一多羅樹，於最高廣蓮花臺上，師子座中安詳而坐，餘諸菩薩亦各處于蓮花臺座，下方世界無量無數諸佛刹中，復有無量無數菩薩之眾，隨從海意菩薩而來聽法，是時大寶莊嚴最勝道場中，所有十方世界普來集會一切菩薩摩訶薩眾，皆悉處于蓮花臺座，周圍充滿殊妙奇特，而彼一切諸來大眾心生歡喜，悉得清淨，歎未曾有，合掌頂禮，彼諸菩薩，時海意菩薩，以彼無量功德寶無垢殊妙莊嚴世界之中，諸勝妙花，其花名為無憂適悅愛樂喜見，量廣一俱盧舍，花有無數多百千葉，隨其所應供養如來，令諸菩薩一切見者深心無垢，宿世善根悉得清淨，是諸眾會皆生歡喜，悅意愛樂，花有光明復有妙香，此諸勝花於世尊前作供養已，復雨廣大殊妙花雨，其一花可七人量，遍布充滿大寶莊嚴最勝道場，一切大眾悉得離生喜樂禪悅之味，空中自然擊種種鼓，出微妙可愛之音，一切大眾聞者悉得禪定妙樂。

爾時海意菩薩摩訶薩作如是等供養事已，從空而下，頭面著地，禮世尊足，右繞七匝，合掌恭敬住立佛前，作是白言，世尊，海勝持慧遊戲出高神通如來問訊世尊釋迦牟尼如來，少病少惱，起居輕利，勢力安不，得妙樂邪，時彼同來一切菩薩悉從空下，亦各頭面禮佛足已，右繞七匝，各各還復本座而坐。

爾時此三千界有大梵王，名大悲思惟，居此梵世，此四大洲無憂安隱，忽然見是三千大

千世界大水充滿混如一海復有俱胝那庾多百千廣大蓮花高顯出現種種勝相及此道場菩薩充滿見是相已即自思惟劫火未然壞相安有大水充滿此復何緣將非如來神變力邪我今宜往問佛世尊此希有相何因何緣時大悲思惟大梵天王作是念已即與六萬八千梵眾隱于梵界恭敬圍繞來詣大寶莊嚴最勝道場佛世尊前住虛空中曲躬合掌頂禮世尊作是白言世尊何故今此三千大千世界大水充滿混如一海復有俱胝那庾多百千廣大蓮花高顯而出及諸菩薩大士皆悉處於蓮花座上而此三千大千世界一切國土城邑聚落諸人民眾及閻浮提四大洲等欲界天宮乃至大海須彌諸山悉無損壞亦無障礙如是等相甚為希有此何因緣復何神力願佛為說

爾時佛告大悲思惟梵天言大梵當知下方世界有佛刹名無量功德寶無垢殊妙莊嚴其佛世尊號海勝持慧遊戲出高神通如來彼有菩薩名曰海意與出過算數諸大菩薩摩訶薩眾而共來此娑婆世界瞻禮恭敬供養於我又復於此廣大集會正法之中而有所問是彼菩薩神通之力於此世界先現瑞相梵天白佛言世尊大集會中所有正法今尚說邪佛言大梵諸佛境界不可思議所有如來智慧辯才及威神力不應限量汝或見於如來默然勿謂無說而我常為十方世界所來菩薩廣大宣說決定正法爾時大悲思惟大梵天王復白佛言世尊佛

所說言現神變者海意菩薩其誰是邪佛言大梵今此會中有大蓮花廣十由旬花中有臺臺上復有眾寶莊嚴師子之座座中有一菩薩大士處于其上身真金色相好端嚴唯除如來餘諸菩薩所有身相皆能映攝有無數千菩薩之眾圍繞頂禮者汝可見不答言已見佛言大梵圓具如是神通相者即是海意菩薩是時大悲思惟梵天乃向海意菩薩恭敬頂禮已即白佛言世尊若有眾生得聞如是海意菩薩名字之者當知是人得大善利我於今日聞此菩薩大士名字得見菩薩如是色相深自欣慶快得善利梵天復白佛言世尊此大集會正法當住為久如邪佛言大梵今此正法隨佛壽量久近而住佛涅槃後有諸菩薩於此正法受持讀誦廣為他人開示演說何以故大梵所有過去未來現在世中諸佛菩提從此中出爾時海意菩薩摩訶薩承佛神力普為此會一切大眾生歡喜故及為大悲思惟大梵天王起信敬故復為莊嚴此正法故亦為顯示己之智慧辯才力故即時同彼高廣蓮花及師子座俱涌虛空高七多羅樹乃於空中說伽陀曰

下方過於塵數刹 有佛刹名功德嚴  
彼佛化主現居中 其名海勝神通慧  
刹中眾德皆圓具 菩薩依止無所畏  
其佛如來說法門 我等聞已能持受  
我等故來茲刹土 瞻仰敬禮十力尊  
其諸菩薩此所來 佛大牛王各伸問  
我今禮此法王已 亦禮無比佛大智

所應供養隨所施 廣伸供養佛正覺  
若能觀佛色無色 離受離行亦離識  
三種領納此亦無 是中潔白常清淨  
若無色相及種好 是為正觀佛世尊  
慧眼清淨照法身 乃見無垢真實義  
若法無取亦無捨 二邊無我無我所  
安住內入性寂然 止息心外諸所取  
有無分別離分別 是心寂默如虛空  
即能供養諸世尊 於正法幢善建立  
若觀諸法猶如幻 此中施受二皆空  
雖知造作本所無 亦不捨離於諸法  
而不決定求菩提 又不決定住生死  
亦無施者無慳心 遠離施中諸過失  
止息調寂身語心 隨行三業無逼惱  
除諸煩惱息燒然 利智諸根常寂靜  
雖知菩提無所得 不捨眾生住無我  
為度破戒諸眾生 修持廣大淨戒行  
覺了諸法刹那性 亦不為諸境所壞  
內心寂靜若虛空 外觀世間猶如幻  
節節支解於身分 亦復不起瞋恚心  
乃至坐樹成菩提 堅持忍行佛所說  
能觀諸法如水月 如泡如幻如陽焰  
了知無壽亦無人 及無摩拏<sub>摩</sub>迦<sub>迦</sub>等  
菩提眾生雖無得 為利他故求菩提  
若聞此理怖不生 是中能發精進行  
若能於心無所著 乃於外境不生厭  
知他眾生心所行 於三世中隨順轉  
令諸魔眾不能知 心之所行隨所轉  
到於彼岸善住心 圓滿禪定神通慧

我聞諸佛所說法 設經無邊劫數中 復於一切佛法中 具智慧藏有力尊 能到所到二俱離 隨諸眾生心所行 雖到彼岸具眾德 無比釋迦大牛王 如日清淨大明曜 又如劫火映諸明 復如須彌大山王 釋迦牛王毫相中 十方一切菩薩眾 瞻佛色相及威光 隨諸眾生心意願 我知如來大威神 佛以一音演說法 乃至眾生差別音 一切眾生意差別 牟尼種種妙音聲 虛空不能度其邊 乃至生死先際中 虛空邊量眾生數 諸佛戒定慧境中 眾生無量咸歸命 多劫精修眾德嚴 我佛具大威神力 見此希有難思尊 佛說海意菩薩所問淨印法門經卷第一

隨所聞已能受持 佛之辯才不能斷 眾生無墮亦無著 三界自在寂默者 是中無去亦無來 所向無住亦無動 亦於眾德無取相 是故我今伸頂禮 能蔽螢光星宿光 上騰梵世下至地 持地亦持諸山等 最勝光明出三界 皆從百佛剎中來 一切皆生大歡喜 如來各各為開示 故從本土來斯剎 隨諸眾生各知解 如來普為隨宜說 如塵如沙尚可數 量等虛空不可數 眾生不能窮其數 亦復不能知其限 生死先際尚可知 畢竟不能知少分 牛王法主人中尊 色相邊際無比度 遍知眾生諸信解 頂禮善調諸趣者

佛說海意菩薩所問淨印法門經卷第二

譯經三藏朝散大夫試鴻臚卿光祿  
大師賜紫沙門臣惟淨等奉 詔譯

爾時海意菩薩摩訶薩說是伽陀已。從空而下。向佛合掌恭敬頂禮。前白佛言。世尊。我於如來應供正等正覺。今有所問。若佛世尊聽許我者。我即當問。佛告海意菩薩言。善男子。恣汝所問。如來應供正等正覺。隨有疑者。一能為宣示演說。令心開曉。海意菩薩乃白佛言。世尊。我先聞有諸菩薩自說淨印三摩地法門。若有菩薩摩訶薩住是三摩地者。而能速證阿耨多羅三藐三菩提。菩薩應當云何獲得如是淨印三摩地門。又復以何行相名為自說。云何是淨印。何能得入彼境界門。又諸菩薩若得聞是三摩地已。云何速證阿耨多羅三藐三菩提。唯願世尊善為宣說。爾時佛告海意菩薩摩訶薩言。善哉善哉。菩薩大士。今汝所問。極為賢善。善男子。汝應專一深固。作意諦聽。諦受。今為汝說。若諸菩薩得是自說淨印三摩地者。即能速證阿耨多羅三藐三菩提。海意菩薩白佛言。唯然世尊。願樂欲聞。於是海意菩薩受教而聽。佛言。海意。若有菩薩於諸善根發勤精進。善心具足。住正定聚。於生死中能以利根積集諸善。為善知識之所攝受。諸佛威神之所建立。因力具足。常當親近諸佛世尊。尊重恭敬。以妙香花塗香。抹香花鬘衣服。繒蓋幢幡。而供養之。若復得見諸佛如來具足相已。或聞正法。美妙言已。或見圓滿清淨眾已。又復得聞無礙

之智。或見如來神境智通。或見如來調伏眾生諸變化事。或教誡神變。或讚歎神變。如是見已。於眾生前。常以大悲發阿耨多羅三藐三菩提心。起大精進。勤求善法。於一切智心而不忘失。以相應行清淨初心。初心淨已。即得清淨彼三摩地。海意。譬如種性所出大摩尼寶。善治寶人授其掌中。妙巧修治。復加磨瑩。乃至其寶得清淨已。彼治寶人即自說言。此摩尼寶去除虛假離諸瑕瑩。是為清淨大摩尼寶。諸有智者。共所愛樂。海意。從菩薩種性發一切智心寶。亦復如是。畢竟能成阿耨多羅三藐三菩提。故由彼菩薩初以宿世善根。及現聞善法。而用磨治。彼一切智心寶。乃至是寶去除意中諸虛假法。遠離過失。十方三世諸佛世尊。共所愛樂。而彼菩薩乃可自說獲得淨印三摩地門。海意。又如清淨大摩尼寶。離九種寶性。何等為九。一者金性。二者銀性。三者頗胝迦性。四者吠瑠璃性。五者馬瑙性。六者珊瑚性。七者赤珠性。八者鷄薩梨寶性。九者吉祥藏寶性。離如是等九種寶性已。乃名悅意清淨光明大摩尼寶。最勝無價。轉輪聖王之所受用。乃非餘王而受用之。又彼大摩尼寶。光明殊妙。亦非餘寶光明等比。海意。諸菩薩一切智心寶。亦復如是。而能超越九種寶性。何等為九。一者異生性。善寶性。二者隨信行人寶性。三者隨法行人寶性。四者無相行寶性。五者須陀洹寶性。六者斯陀含寶性。七者阿那含寶性。八者阿羅漢寶性。九者緣覺寶性。超越如是九寶性已。第十乃

名一切諸佛共所加持深心堅固大悲寶性。菩薩如是磨治所發一切智心寶時，超勝一切聲聞緣覺，而能照明一切眾生相續種子。海意又如真實大摩尼寶，而能容受磨治，堪任摧壓，穿亦不壞。彼摩尼寶能於世間善所作用，為諸眾生施作福事。菩薩久植諸善根者，亦復如是，而彼所發一切智心寶，容受磨治，堪任摧壓，穿亦不壞，是寶真實離諸過失，而彼一切智心寶，能為一切眾生作大饒益。

復次海意云，何是為能善磨治一切智心寶。所謂先當具修三戒淨十善業，慈心隨轉，故以清淨心觀視一切眾生，悲心隨轉，故隨諸眾生何所作事皆往營助，喜心隨轉，故於一切眾生諸有善法悉為成辦，捨心隨轉，故於一切眾生而無損害，無諂誑，故其心正直，無怠墮，故於利益事深心勤行，心自在，故即能發起一切善根，得正念正知，善伏心，故其心調暢，常少欲，故能徧修頭陀功德，能善資養生，喜足，故即不斷聖種，於師尊聖賢之所不生侮慢，故即能謙下，常起恭敬，心安定，故能離我慢，及增上慢，無濁亂，故無不清淨心，不恃己，故能知自行，不毀他，故能護眾生，離增上慢，故能親近正法，隨授法藥，於諸義中能領解，故是求法者於諸法中初淺次深漸增廣，故能具法欲，修無諍行，故即常得法樂，遠離非法，故能勤求正法，於三寶中常慚愧，故能不斷淨信，信業報，故於一切善法中如理作意，修正行，故於威儀道隱密寂靜，心不高，故而常柔軟，勤行奢摩他，故能離掉舉，慧善安

住，故無毀無譽，安然不動，故心如山王，能離高下，諸對礙，故其心如地，內意清淨，故其心如水，無異想，故其心如火，無繫著，故其心如風，妙無垢，故心如虛空，勤求出家，故能令佛眼永不喪失，身能離故樂修寂靜之行，心能離故常修正法之行，於諸所行不為塵境之所盜，故說真實語，誓願昭明，故如說能行，不為煩惱所摧伏，故心常清淨，畢竟無破壞，故能修集淨戒，乃至小罪猶懷懼，故即能於戒無缺無壞，不為求生天，故於戒不斷，純一潔白，行故戒無濁染，常能親近善知識，故而得開明大菩提道，眼清淨，故得無礙光，耳清淨，故得無礙聲，鼻清淨，故得無礙香，舌清淨，故得無礙味，身清淨，故得無礙觸，意清淨，故得無礙法，復次海意，菩薩若欲離貪結者，應當常修不淨之觀，欲離瞋結，修慈心觀，欲離癡結，修緣生觀，欲除五蓋，善觀五根，欲拔諸障，清淨五力，欲蠲現起諸煩惱，故於出離道應常清淨，修正行，故能離貪瞋癡慢等怖，無慳心，故能行法施，無悋攝，故能行財施，大菩提心，常堅固，故不樂餘乘之法，內心寂靜，故能隱密諸根，外境寂靜，故善觀諸過失，於生死中常怖畏，故不作諸罪，心無懈倦，故積集善根，而無厭足，為渡四流，故常善修治，大乘法船，為令眾生到彼岸，故善作橋梁，菩薩常以不懈退心，拔諸眾生，出生死泥，到安隱處，海意，菩薩若能具修如是諸行相者，即得圓滿布施之行，亦能清淨持戒之行，此為菩薩能善磨治所發一切智心寶，爾時世尊重說頌曰：

先當善戒身語心  
慈心觀視諸眾生  
悲心助營他所作  
捨心不害諸眾生  
無諂誑，故心常正  
深心增長諸善根  
心自在，故念正知  
少欲能修頭陀因  
喜足善行於聖種  
而能不生輕侮心  
定心不起增上慢  
不恃己，故自了知  
親近深固妙法藥  
希法名為求法人  
修無諍行名樂法  
不壞三寶具信心  
於不善中心懷愧  
慚愧具足護諸根  
明了業報勝所作  
於緣生法不相違  
善護威儀修正行  
掉舉不生，正行修  
慧善住，故無毀譽  
堅固願中無退心  
苦樂無動心，如地  
心如火，無異想生  
心如虛空，妙無垢  
身離能修寂靜心  
所行常說真實語

防護十種清淨業  
一切智心此磨瑩  
喜心他法為成辦  
一切智心此磨瑩  
止罪能修利益事  
一切智心此磨瑩  
善伏心，故心調暢  
一切智心此磨瑩  
復常恭敬於師尊  
我慢邪慢皆遠離  
無濁亂，故心清淨  
不毀他，故為他護  
離增上慢，治諸病  
勤求法，乃具法欲  
離非法，故能求法  
一切智心此磨瑩  
於諸如來起慚心  
一切智心此磨瑩  
信解不著邊執心  
一切智心此磨瑩  
心無高，故常柔軟  
一切智心此磨瑩  
安然眾觀如山王  
一切智心此磨瑩  
意淨如水，滌塵勞  
心如風行，無繫著  
勤求出家，佛眼明  
心離常依正法行  
如說能行誓願明

正(明)止(正)離(實)實(實)實(實)  
四四九

清淨不為染所摧	無破毀故修戒行
於戒無缺亦無壞	小罪能壞大懼心
護戒亦不求生天	戒常潔白無濁染
常能親近善知識	悉為開明菩提心
無礙光明照世間	斯由獲得清淨眼
智者隨聞種種聲	不生欣樂不生厭
一切聲中表義無	斯由獲得清淨耳
鼻香舌味皆如是	身觸意法亦復然
觸等高下想不生	斯由獲得諸根淨
欲離貪染及瞋癡	當修不淨慈心觀
於緣生法復善修	一切智心此磨瑩
若欲除去五種蓋	應當善觀於五根
欲拔諸障之所纏	善住清淨於五力
知出離道除現障	離不深固住深固
於四念處常勤修	正斷神足亦如是
復常增進七覺分	聖八正道亦增修
無貪無瞋怖不生	善護諸根離癡結
無慳能行於法施	不生鄙吝愛護心
於財無攝常施他	彼菩提心此成就
於諸財寶無希取	不捨菩提不求報
為攝眾生故常行	布施愛語利同事
於菩提心不捨離	亦不愛樂於餘乘
隨觀如來功德門	如須彌山心堅固
內心寂靜省己過	外護他非不譏毀
諸所作中離瑕疵	怖生死故不造罪
勤行善法無懈倦	嚴淨佛土不疲勞
護法不生減失心	度脫眾生無退墮
常勤修治大法船	濟渡四流生死海
復為橋梁接眾生	引到涅槃安隱地

拔眾生出深淤泥	致於清潔無畏處
怖畏眾生施慰安	自渡渡他到彼岸
若於此法善成就	即諸菩薩大無畏
彼能常淨菩提心	諸煩惱垢不能染
虛空無垢尚能染	空中鳥跡尚可見
煩惱不染菩提心	自性本來常清淨
復次海意云何是為菩薩於其所發一切智	心寶堪任摧壓又復何謂摧壓行相海意若
此菩薩於其一切智心寶中或有破戒不可	意人或復諸魔或魔徒眾或魔力所加魔宮
賢聖或魔使者固來煩惱振擊動搖期剋打	擲當於爾時菩薩堅固大菩提心令無所壞
亦復不壞度脫一切眾生大悲精進亦復不	壞勤力護持令三寶種不斷不絕亦復不壞
諸佛法中勤行積集一切善根亦復不壞為	成辦相好故積修福行亦復不壞為嚴淨佛
土故勇力增進亦復不壞為護正法故不惜	身命亦復不壞普為度脫諸眾生故不著己
樂菩薩若能如是深心具足起如是意乃能	於彼諸眾生所或遇瞋恚打擲罵辱譏毀之
者菩薩爾時悉能忍受或為一切眾生之所	摧壓亦悉堪任以其菩薩普為救度一切眾
生不疲不懈不退不沒增發勢力勇起精進	捍勞忍苦攝受心故若有他人固來起瞋菩
薩爾時不以瞋對他來打擲或復破毀菩薩	爾時皆不以對作是思惟我今應被大乘忍
鎧何以故此大乘法與諸世間極相違故世	間眾生順生死流我大乘法逆生死流世間
眾生互相違背我大乘法令諸眾生斷相違	

故世間眾生瞋恚熾盛我大乘法忍力增強世間眾生互相欺誑我大乘法令諸眾生慧心圓滿又復世間或有眾生周行十方執持器仗隨逐菩薩於諸方處若行若住若坐若臥或有一人發大菩提心者或修布施心者或修持戒忍辱精進禪定智慧心者乃至或聞發一善根心者我當隨於彼彼方處斷割其身節節支解猶如棗葉菩薩設遇如是等事悉能堪忍又若世間一切眾生皆起瞋恚巧出惡言罵辱譏毀菩薩爾時於諸眾生不起少分憍動之心所以者何今我此身於無量無數生死之中先際已來遍歷諸趣無所不作或在地獄或在餓鬼畜生等趣乃至今在人趣之中耽味飲食諸欲受用聽受非法艱苦追求邪命資養多種逼迫於己身命都無果利雖復多所營作不能自利亦不利他是故我今乃至生死後際之中設使一切眾生於我身分斷割支解寧受眾苦我終不捨一切智心亦復不捨一切眾生亦復不捨諸善法欲何以故今我此身多種逼惱苦切殘毀比地獄中所受之苦百分千分乃至優波尼殺曇分皆不及一是故我於佛法之中永不捨離亦復不捨度脫眾生所緣大悲何以故如佛所說一切善法多諸障難世間眾生多於不善法中而能營助少能營助於諸善法是故我今於善法中發勤精進營助修習非於不善法中而助其力故我於彼一切眾生瞋恚等事悉能堪忍若諸眾生隨所起事我即旋當施所對治若有眾生於我起瞋加復嫌恨我即

施其辱忍之法。由我施彼忍辱法已。忍力現故。我於彼所寧捨身命終不起瞋。是故菩薩若如是修。即不難得阿耨多羅三藐三菩提。果。又復若時。或以因緣瞋恚起時。菩薩當念。我起斷瞋之法。斷法云何。謂若愛樂於身。若繫屬身。若取著身。如是等法皆悉捨離。由能如是棄捨身故。瞋恚不起。海意。菩薩若於如是等法。能善思惟勤修習者。即能堪任一切眾生之所摧壓。於一切智心不壞不失。海意。當知堪任摧壓有其三種。一者堪任摧壓於身。二者堪任摧壓於語。三者堪任摧壓於心。佛說海意菩薩所問淨印法門經卷第一

### 佛說海意菩薩所問淨印法門經卷第三

譯經三藏朝散大夫試鴻臚卿光祿  
大師賜紫沙門臣惟淨等奉 詔譯

復次海意。云何是為菩薩堪任摧壓於身。謂若菩薩或遇身分欲斷壞時。菩薩應當依法觀察。餘諸眾生。又若有具善巧方便。菩薩即能修行圓滿六波羅蜜。何等行相是為善巧方便。菩薩圓滿六波羅蜜。所謂菩薩或遇己身欲斷壞時。若不惜其身。棄捨其身。亦不愛樂。此即能修施波羅蜜。又復若遇身欲壞時。於一切眾生起大慈心而不棄捨。此即能修戒波羅蜜。又復若遇身欲壞時。菩薩為度一切眾生故。設身斷壞。堪任忍受。其心不動。忍力發現。此即能修忍波羅蜜。又復若遇身欲壞時。不捨一切智心。發大精進。勇力攝受。於生死中起諸善根。此即能修精進波羅蜜。又

復若遇身欲壞時。於其所發一切智心。實而不棄捨。當善伺察。大菩提心。如是伺察內外寂靜。此即能修定波羅蜜。又復若遇身欲壞時。菩薩應當伺察其身。猶如草木土石等類。悟了己身不實如幻。如實義者。諸行無常。諸行是苦。諸法無我。涅槃寂靜。若能如是諦察其身。此即能修慧波羅蜜。如是行相。是為菩薩修行圓滿六波羅蜜。乃得不退轉於大乘之法。此等名為菩薩堪任摧壓於身。

復次海意。云何是為菩薩堪任摧壓於語。謂若菩薩。或有人來若虛若實。惡言譏毀。瞋恚罵辱。菩薩爾時堪任容受。不起瞋恚。斷彼怨縛。又若有具善巧方便。菩薩或遇他來惡言譏毀。罵辱之時。菩薩聞已。應當修行圓滿六波羅蜜。何等行相是為善巧方便。菩薩圓滿六波羅蜜。所謂菩薩或遇他來惡言譏毀。罵辱之時。菩薩聞已。即作是念。此人先世造慳吝因。由如是故。慳吝垢染。今所發現。亦復不曾親近善友。是故此人不捨於瞋。我今為說斷瞋之法。何以故。我能信解捨法故。不慳吝。亦不曾親近諸善知識。是故我今護其惡語。捨離瞋恚。此即能修施波羅蜜。又復他來譏毀罵辱。菩薩爾時即作是念。此人破戒惡業發現。故來瞋恚罵辱於我。我今修集清淨禁戒。故我於彼不生瞋恚。我復守護菩提心。故念業報。故此即能修戒波羅蜜。又復他來譏毀罵辱。菩薩爾時即作是念。此人麁猛過失多所瞋恚。故來譏毀罵辱於我。我今具其忍辱之力。廣修慈行。故我於彼不生瞋恚。此

即能修忍波羅蜜。又復他來譏毀罵辱。菩薩爾時即作是念。此人懈怠遠離善法。故來於我瞋恚罵辱。今我發起廣大精進。勤行修習。植諸善本。曾無厭足。我願此人先得坐於菩提道場。我乃最後取證阿耨多羅三藐三菩提果。若被如是精進鎧者。此即能修精進波羅蜜。又復他來譏毀罵辱。菩薩爾時即作是念。此人失念。復不正知。而亦不能止息煩惱。故來於我瞋恚罵辱。今我止息煩惱。正念正知。專注一境。復不忘失大菩提心。我今應為此等眾生。不調伏者。不寂靜者。不護諸根者。不止息者。作利益。故被大乘鎧。若能如是安安心者。此即能修定波羅蜜。又復他來譏毀罵辱。菩薩爾時即作是念。此人執著我相。情見有所得境。故來於我譏毀罵辱。今我依法。於已起瞋。若未起瞋。二種之中。如實伺察。瞋者瞋法。皆不可得。如理推求。若自若他而悉遠離。有所得見。故能堪任。此即能修慧波羅蜜。海意。如是行相。是為善巧方便。菩薩修行圓滿六波羅蜜。乃得不退轉於大乘之法。此等名為菩薩堪任摧壓於語。

復次海意。云何是為菩薩堪任摧壓於心。謂若菩薩。遇諸魔來相擾壞時。菩薩應當堅固不動。大菩提心。又復一切邪異之語。以有所得。有所著相。來相擾時。亦應如實安住。內心於一切智心。勿當忘失。何以故。彼魔有大威力。乃至最後變佛形像。來現汝前。作如是言。汝於大乘法中。何有力量。汝宜棄捨。如是重擔。止息所行。勤苦精進。菩提難得。佛法難得。

於生死中徒歷多苦。今汝大士。若欲息其苦者。宜速取證聲聞涅槃。若諸菩薩或遇魔來。以如是相固燒壞時。當被如先堅固之鎧。不應棄捨。亦當內心無動無壞。若如是者。即於無等等心不能減沒。菩薩爾時乃作是念。我當決定詣菩提場。我當決定以大智力摧魔軍已。然後取證阿耨多羅三藐三菩提果。我當決定轉妙法輪。我當決定普於三千大千世界說廣大法。我當邀以一切眾生普與法施。悉令滿足。一切諸佛以他心智照明於我。一切賢聖證知我此大菩提心。實能堪任諸所摧壓。我不虛誑。一切諸佛一切賢聖一切眾生。乃至亦不自為虛誑。海意。若諸菩薩如是修者。即能堪任摧壓於心。乃得不退轉於大乘之法。此等行相。是為菩薩於其所發一切智心。實堪任摧壓。若於忍辱波羅蜜被堅固鎧。即於精進波羅蜜而不懈退。若復此二波羅蜜中能圓滿者。是即菩薩摩訶薩於一切智心。實堪任摧壓。爾時世尊重說頌曰

大菩提道心不壞 亦復不壞大悲心  
於三寶中善護持 積集佛法亦無失  
三十二相八十好 十力莊嚴妙相身  
多種修作福智圓 堪任摧壓故無退  
佛土功德無邊量 無願力故悉嚴淨  
法寶無上最勝門 我願堅固常守護  
多百眾生無邊際 我願普令得度脫  
內心不壞利樂因 是故堪任於摧壓  
所有十方世界中 乃至無邊眾生界  
普盡一切諸眾生 各執器仗來逼惱

作大恐怖生瞋恚 如是期剋而打擲  
菩薩為修功德因 起勇勝心能堪忍  
經歷無邊多百劫 從本生死先際來  
眾生惡言罵辱時 彼菩薩心無惱害  
為大智故能堪忍 不生忿怒不生瞋  
如是摧壓隨了知 故能忍受得清淨  
又復普盡諸眾生 各執器仗來加害  
於我身分悉支離 乃至支離分段而破折  
菩薩爾時心無動 不生少分瞋恚心  
大菩提意堅固持 堪任摧壓此清淨  
菩薩若行若復住 坐臥威儀他所隨  
於中伺求或有人 大菩提心不捨者  
或行布施等諸行 或復發起餘善心  
即當斷割彼人身 節節支解而離散  
菩薩設遇此苦時 亦於此人心生喜  
思念無邊百劫來 遍歷諸趣靡不作  
地獄鬼畜三塗界 乃至今得生人中  
身雖破壞果利無 為求佛智身棄捨  
今我雖得於人身 無數眾苦常逼迫  
若比阿鼻地獄中 此苦百分不及一  
我寧處彼地獄中 忍受其苦經百劫  
佛及正法與眾生 此三我終不棄捨  
我觀此身無常法 剎那謝滅猶如幻  
四界虛假共合成 佛說此四如蛇毒  
我若棄捨於此身 速離身中諸毒害  
彼煩惱毒欲消除 自他成佛自然智  
今我此身處世間 多怖畏事生恐怖  
為求身諸安樂緣 因諸所欲飲食等  
我若棄捨於此身 止息諸緣離諸怖

若能解入此思惟 即能堪任諸摧壓  
世間眾生多百千 不善法中常營助  
少人能於善法中 隨應勤力而營助  
故我於諸不善法 是中不復助其力  
我當助修忍辱門 忍辱之言佛所說  
所有十方一切佛 一一皆為證明我  
如我所起決定心 於佛乘中永不壞  
彼大威力諸賢聖 亦悉證我堪忍心  
我所堪任摧壓因 是中不作諸過失  
如佛所說身語意 此三摧壓有多種  
彼彼勇猛悉堪任 如先所說皆不壞  
是身具有多種苦 彼一一苦無邊際  
於如是苦若堪任 此身摧壓而清淨  
若身遭苦而離散 節節支解斷壞時  
六波羅蜜若圓成 彼善方便大智德  
所謂布施及持戒 忍辱精進與禪定  
最勝慧等若同修 須臾攝受皆圓滿  
或時若能棄捨身 亦復不愛而不惜  
爾時應當如是修 圓滿布施波羅蜜  
若於眾生廣行慈 即不破毀淨戒行  
現證菩提攝受因 圓滿淨戒波羅蜜  
其身設欲斷壞時 應當堅固忍辱力  
由斯忍力若勤行 圓滿忍辱波羅蜜  
精進重擔荷無倦 內心亦復不生厭  
身雖破壞力堅持 圓滿精進波羅蜜  
其身設欲斷壞時 不念棄捨菩提心  
於諸煩惱塵暗中 勤力為令皆消滅  
為修禪定解脫力 寧當破壞於己身  
普令眾生得離塵 圓滿禪定波羅蜜

我觀此身實無我 是身如幻復如電  
作者受者二俱無 是中實無有少法  
於身艱苦纏縛中 善為眾生作度脫  
到勝彼岸自他圓 圓滿勝慧波羅蜜  
若能於此深固法 方便思惟常善修  
彼能堪任摧壓身 是中不起諸過失  
菩薩若時聞惡言 不善譏毀而輕謗  
聞已不生瞋恚心 能起慈心善調伏  
棄捨瞋恚諸過失 清淨布施波羅蜜  
慈心廣大普運行 清淨持戒波羅蜜  
忍力發現彼對治 清淨忍辱波羅蜜  
數起精進佛智求 清淨精進波羅蜜  
於諸境中定其心 清淨禪定波羅蜜  
了不可得諸音聲 清淨勝慧波羅蜜  
菩薩聞諸惡言已 應當思惟於深法  
堪任摧壓於語言 是故不著諸過失  
假使百千諸魔眾 邪異外見悉從來  
勸令棄捨方便修 菩提分位言難得  
菩薩爾時心不動 勢力增進轉精修  
是故堪任摧壓心 多種摧壓皆無壞  
忍辱精進此二行 善修安住如山王  
諸所摧壓悉堪任 諸眾生同一勇猛  
磨治心寶摧壓者 如來十力悉能知  
得見現證菩提尊 亦復得受成佛記  
復次海意云何是為菩薩於其所發一切智  
心寶穿亦不壞謂若菩薩於彼一切智心無  
所領納無所依著亦無所住不入不入無戲  
論無分別壞諸分別無所安立當以正智於  
甚深法如實伺察何等是為彼甚深法所謂

隨順緣生之法如實覺了無因所緣不斷不  
常遠離邊見自性無我我無自性故一切法  
亦無自性諸法本來生無所生解了於空信  
順無相無願無求於真實慧無所造作畢竟  
無常色如聚沫受如浮泡想如陽焰行如芭  
蕉識如幻法諸界無所動諸入互相生心無  
所住亦無作意於增上所非增上所於  
平等法如實覺了無種種行相等同一味而  
悉同住一乘之道修道行智依於勝義以智  
了知於義無著彼一切聲悟入非聲智知一  
切聲前後際斷故文義二種智入無二現證  
諸法不可說義無我義是苦智畢竟義是集  
智不和合義是滅智有為無為平等悟入是  
道智離前後際是身念處生滅無住是受念  
處觀無所緣是心念處法界非界性平等平  
等義是法念處心自在義是四正斷離諸障  
礙是四神足出生義是信根無念是精進根  
無作意是念根超越戲論是定根無他信是  
慧根所緣無障礙是信力通達諸力是精進  
力心止息住是念力無所動轉是定力於念  
隨念是慧力於一切法平等相應是念覺分  
不出不入是擇法覺分無我所是精進覺分  
身心善住是喜覺分平等覺悟是輕安覺分  
離二法是定覺分遠離諸見是捨覺分一切  
分別無分別中離諸遍計是正見一切音聲  
平等悟入是正思惟離身心法是正語一切  
所作悉得輕安名為正業無高無下是正命  
若善不善隨施設已平等而住是正勤於心  
所緣平等悟入是正念寂靜安住妙奢摩他

是正定於見非見而悉清淨無所生義是無  
常義本來不生義是苦義無所行義是無我  
義止息義是寂滅義善調伏心是布施義住  
清涼性是持戒義隨知盡法是忍辱義於一  
切法能善決擇是精進義止息內心是禪定  
義如實了知諸法無相是勝慧義一切眾生  
本來清淨是慈義與虛空等是悲義喜無所  
得是喜義一切發行皆悉究竟是捨義一切  
諸法先際已來三輪清淨是空義後際清淨  
是離義現在清淨是無我義海意若諸菩薩  
於如是等諸甚深法無起無滅離諸文字與  
虛空等於順於違智入平等若能如是思惟  
觀察如實所行而彼菩薩即能於其所發一  
切智心寶穿亦不壞雖復如是穿彼一切智  
心而無發悟即於諸法自在理中乃能現證  
海意譬如日月各處自宮於四大洲周遍普  
照而彼日月天子都無發悟亦不作是念我  
能往諸方處或復不往而為照耀但由一切  
眾生福果報力照明如是海意彼具善決擇  
智菩薩亦復如是雖於無量諸佛剎中廣為  
眾生作大利益而彼菩薩都無發悟未嘗數  
起諸作意想然彼所作隨應發現  
復次海意若具決擇智菩薩應於定波羅蜜  
及慧波羅蜜中如理伺察何以故住等引心  
菩薩不修觀法修觀行菩薩不住等引心若  
復修觀行者彼即有慧由有慧故能善觀察  
何所觀察所謂觀於諸法實相云何是為諸  
法實相若於諸相而無所行此即是為諸法  
實相何等是諸法相謂有所表即諸法相如

是表中如實之相。此亦說名諸法實相。若復如是一切了知。即能悟達無相無無相。何者是相。何者是無相。相即是生。無相是滅。若無相無無相。即無生亦無滅。若法無生亦無滅者。即諸法性本來常住。法界無壞。真如無動。實際不變。如是法性。此即說名如實解了緣生之法。覺悟諸法真實之相。現證實際無二真理。如是乃以現量智知。海意。此即名為具決擇智。菩薩摩訶薩。當佛世尊宣說如是容受磨治。堪任摧壓。穿亦不壞。法時。此會中有十那庾多天人。悉發阿耨多羅三藐三菩提心。萬六千菩薩皆得無生法忍。

佛說海意菩薩所問淨印法門經卷第二

佛說海意菩薩所問淨印法門經卷第四

西天譯經三藏朝散大夫試鴻臚卿傳  
梵大師賜紫沙門臣法護等奉 詔譯

爾時世尊重說頌曰

菩薩若聞菩提心 乃能貫穿一切法  
即此所有貫穿智 於諸法中無所著  
雖復了知甚深法 菩薩於中不生怖  
而亦不起恐怯心 彼能獲得最勝道  
諸法若因若所緣 如實覺了緣生法  
有慧隨順諸法生 而實不執於邊見  
諸法若斷若常中 智者不生於著礙  
覺了中際亦復然 是故實際不思議  
若法自性本無我 是中我亦無自性  
諸法無性亦復然 本來不生皆空寂  
諸法無生亦無起 空無所取常清淨

遠離戲論無相門 無心亦復無求願  
現觀諸色自性中 受如浮泡暫起滅  
行如芭蕉中不堅 所有四界性無動  
內外諸入亦復然 應知心法不在內  
意法無我亦復然 彼一切法無作意  
於一切法平等中 法本一味無異性  
道智如實若了知 智者於義能悟入  
世間所有一切聲 若文若義雖善解  
解此不可說義門 諸法不生是苦智  
諸法盡義是滅智 於彼身受心法中  
無念復無作意行 若觀法界非界性  
無斷之斷正法門 於心若得大自在  
超越一切有著心 若於一切法寂靜  
無念之念正法門 若了諸法無作意  
超越諸法戲論門

一切皆與虛空等 遠離一切諸欲貪  
其猶聚沫知無實 想如幻法非久固  
與彼虛空界同等 境互相生而冥默  
亦非於外有所得 是中諸識皆無住  
而亦遠離於我相 如實覺了於正性  
一道一乘皆同等 此義顯示於勝義  
觀聲非聲能覺了 前際後際二俱斷  
於中了知無二法 即能現證真實性  
諸法平等是集智 諸法無為是道智  
如理隨觀一一法 此說是為四念處  
平等正盡而平等 此說是為四正斷  
此說是為四神足 此即是名為信根  
此說名為精進根 此說名為念根  
此說是名為定根 此說是名為慧根

若法不起於他信 即能獲得真實智  
於心亦無所覺知 此名信力精進力  
若了無生無滅智 此即是名為念力  
寂定於心無所行 此即定力得成就  
非有非離於分別 此即是名為慧力  
諸法義中實覺知 此說是為七覺分  
於法平等無差別 此說是名為正見  
無二法中如實觀 無生是觀諸正道  
無生是為無常義 無起是名為苦義  
無行是名無我義 止息句是寂靜義  
調伏心即是布施 寂靜心即是持戒  
盡法隨向是忍門 正慧伺察名精進  
畢竟寂止是禪定 如實了知是為慧  
眾生本來清淨心 了知此說名為慈  
與虛空等名為悲 清淨適悅是為喜  
一切所緣無住心 此說是名為捨行  
若復三輪得清淨 即能了知一切法  
如是貫穿諸法門 而復永斷諸見執  
此中所有定及慧 即此二法能貫穿  
遍入無量境界門 此說是名正法智  
爾時世尊復告海意菩薩摩訶薩言。海意。若菩薩得如是淨遍淨已。於一切眾生所起無虛假意。若為眾生之所摧壓。不生逼惱。及諸障礙。得善覺了智。得決定慧。而彼菩薩即能於此自說淨印三摩地根本。無住中住。云何是為安住三摩地根本。謂於一切眾生無障礙。故起大悲故。若得一切眾生常所恭敬心。亦不高。若不恭敬心亦不下。由是之故。即法無所起。亦不生慢心。是故乃能隨住諸法。不

住癡法能生法智普遍皆得智為先導身業具足智為先導語業具足智為先導意業具足若身語意諸所作業一切皆以智為先導菩薩即能隨智而轉云何是菩薩智為先導身業具足謂若眾生應見色身而可化度及調伏者菩薩即當現威儀相令彼眾生心得調伏菩薩雖復如是現相然無發悟亦無分別若或菩薩身起過失愛着於身身起異相身行屈曲身有動亂身生計度若如是者而彼菩薩諸有過失集現其前如斷多羅樹心而於諸法後不復生又若菩薩身得清淨一切勝相莊嚴其身手足柔軟殊妙可愛成福生身諸根無劣身分圓滿菩薩雖具如是莊嚴之身然於色相亦不驕恃身雖嚴好而不生於和合之想菩薩若見一切眾生種種色相有缺壞者菩薩爾時不起慢心為求法故謙下恭敬所以者何若自身法性與一切眾生身之法性皆悉平等依止於智菩薩於身及身法性悉了知已即得法身不受分段身何名法身謂以禪悅而為飲食非分段食菩薩為欲順世間故愍眾生故示現受彼世間之食不為身支治瘦劣故菩薩但於法身以其法命而為資養非假世間段食所資何名法命謂所資養不從因緣所造作故不越聖行何名聖行所謂無貪無瞋無癡離諸煩惱隨所施設密護於戒是名聖行菩薩由此智為先導身業具足故獲諸智通神力成就以無發悟心於一切佛剎中普為現身隨諸佛剎一一眾生應見菩薩色相光明莊嚴身者

菩薩即住無所發悟無分別中具足光明莊嚴身相於其身中放大光明是光普照無量無數諸佛剎土一切地獄惡趣眾生蒙光照觸悉得快樂由快樂故樂觸現前得樂觸故一切眾生煩惱燒然皆悉止息咸得清涼身心調暢彼諸眾生得調暢故善作佛事海意如是等法名為菩薩智為先導身業具足復次海意何名菩薩智為先導語業具足謂若菩薩凡出語言而常遠離語中一切麁惡過失海意何名語中麁惡過失所謂菩薩常當遠離六十四種語之過失何等六十四者菩薩無麁澁語二者無濁亂語三者無壞器聲語四者無衰弱聲語五者無極高聲語六者無極下聲語七者無猛惡聲語八者無堅硬語九者無饒吃語十者無逼惱語十一者無離散語十二者無燒然語十三者無迷惑語十四者無怨恨語十五者無密切語十六者無染著語十七者無呻吟語十八者無童稚語十九者無震吼聲語二十者無熾盛語二十一者無振觸語二十者無不知時語三十者無貪隨卑語四者無瞋障礙語五者無癡狂亂語六者無驚怖語七者無慢執語八者無作破壞語九者無諂曲語十者無高慢語十一者無離慢卑下語十二者無隨愛覆藏語十三者無非愛計露語十四者無不實說語十五者無缺失語十六者無虛妄語十七者無鬪亂語十八者無兩舌語十九者無惡口語二十者無綺語二十一者無破朋友語二十二者無極利語二十三者無極柔軟語四者無凡俗語五者無不藏護語六者無繁多語七者無瞋害語八者無鬪諍語

四十者無賤劣語五十者無動亂語五十一者無輕浮語五十二者無面譏語五十三者無戲劇語五十四者無歌音語五十五者無非法語五十六者無離間語五十七者無自讚語五十八者無毀他語五十九者無侮翫語六十者無激動語六十一者無違背佛法僧語六十二者無毀謗賢聖語六十三者無非理作證語六十四者無一切麁惡過失等語海意如是六十四種語中過失菩薩凡所發言皆悉遠離即得語業清淨凡所發言皆說無間斷語說如實語說正真語說誠諦分位語說隨諦轉語隨入一切眾生語言知一切眾生意樂令諸眾生皆生歡喜照明一切眾生根性息諸煩惱住佛威神任持正法所發語言分明顯了美妙可愛離諸過失皆由福行之所成故不生於貪攝功德語不生於瞋深無源底不生於癡十方世界施設語言非無義利隨往一切處皆無作相海意此為菩薩智為先導語業具足復次海意何名菩薩智為先導意業具足所謂菩薩剎那於一心中遍入一切眾生心行皆悉明了住三摩呬多中現諸威儀事然亦不起彼三摩地一切魔眾悉不能知菩薩心業遍入一切聲聞緣覺之心彼亦不知而是菩薩終不害心自害他亦不俱害非心意所表無少法中而生障礙於一切法中起智了知由彼心意無表了故即無所了知不受而受未具佛法亦不滅受而為取證海意此名菩薩智為先導意業具足海意如是等法是為菩薩安住自說淨印三摩地根本此根本者謂即菩薩身語意業皆以智為先導由

其三業智先導故。即能獲得自說淨印三摩地法。海意當知有十種法。此三摩地名為自說。何等為十。一者初發起行。名為自說。深心清淨故。二者菩薩之行。名為自說。六波羅蜜多清淨故。三者顯示潔白之行。名為自說。一切善法清淨故。四者相好圓滿之行。名為自說。無礙福行清淨故。五者得辯才行。名為自說。隨聞法行善令。他得清淨故。六者念定不散亂智。名為自說。遠離一切麤重蓋障。現起煩惱清淨故。七者菩提分法智。名為自說。不放逸清淨故。八者表示奢摩他毘鉢舍那智。名為自說。心意識清淨故。九者十地次第之智。名為自說。一切對治建立法中。超越障礙。悉清淨故。十者大菩提場莊嚴之智。名為自說。斷一切不善法。集一切善法清淨故。海意當知。是十種法故。此三摩地名為自說。海意當知。復有二十種法。此三摩地名為淨印。何等二十。一者內淨名為淨印。我清淨故。二者外淨名為淨印。我所清淨故。三者身淨名為淨印。一切見中悉清淨故。四者一切法無我清淨名為淨印。本來清淨故。五者於一切法平等。覺了清淨名為淨印。一味清淨故。六者空無相無願清淨名為淨印。一切解脫清淨故。七者虛空清淨名為淨印。畢竟清淨故。八者眾生界法界清淨名為淨印。離諸所作故。九者現所見清淨名為淨印。自智通清淨故。十者日輪光明清淨名為淨印。常照曜清淨故。十一者三世無礙。知見清淨名為淨印。離諸障礙清淨故。十二者表了門清淨名為淨印。

識智無住清淨故。十三者無為清淨名為淨印。有為自性清淨故。十四者了知緣生清淨名為淨印。善觀緣法故。十五者隨證力無所畏。佛法清淨名為淨印。無能敵實智清淨故。十六者了知佛法相清淨名為淨印。先業清淨故。十七者大慈大悲清淨名為淨印。不捨眾生清淨故。十八者降伏諸魔外道清淨名為淨印。一切所行清淨故。十九者破一切煩惱。習清淨名為淨印。諸法自性清淨故。二十者於一剎那心中。普盡一切佛法之門。隨知清淨名為淨印。積集圓滿清淨故。海意當知。是二十種法故。此三摩地名為淨印。海意當知。菩薩當坐菩提場時。乃能獲得是三摩地。得是三摩地後。當獲八種不共大神通相。何等為八。一者忽然此三千大千世界。悉變金剛所成之地。二者一切樹林花果枝葉。皆悉開敷。俱向菩提樹。低垂曲折。恭敬相。三者一切眾生。於剎那間。不為一切煩惱之所惱害。四者一切地獄惡趣眾生。悉見菩薩坐菩提場。見已皆獲快樂具足。五者一切世界空中。悉現金色光明。廣大照曜。六者大地皆悉震動。然於其中。亦無少分眾生。而生燒害。七者所有十方。現住說法教化諸佛世尊。以無畏法。施其安慰。作如是言。汝善男子。最勝最勝。是大導師。八者於一剎那心中。一切佛法。集現其前。海意。而是菩薩得彼淨印三摩地已。後獲如是八種不共大神通相。而能出生無量功德之事。一切悉同此三摩地神通威力。佛說海意菩薩所問淨印法門經卷第四

佛說海意菩薩所問淨印法門經卷第五

西天譯經三藏朝散大夫試鴻臚卿傳梵大師賜紫沙門臣法護等奉詔譯

爾時世尊重說頌曰

此法善淨復明亮 本無和合與空等  
無住無滅無起生 是印隨攝於佛印  
住彼根本得總持 長時修習慈悲行  
若敬若慢世所行 平等慧中無喜恚  
等智隨住於法性 不住癡暗及癡法  
雖住智中無得心 安止等智常清淨  
智常覺了身所作 以諸智行利世間  
眾生若見清淨身 皆得離塵勝佛智  
威儀善戒無散亂 有無分別中隨行  
身諸過失雖無邊 本來不生無所斷  
彼獲莊嚴妙相身 手足柔軟福嚴具  
清淨圓滿諸根身 不特色相智所作  
若見貧賤苦眾生 謙下尊敬而不慢  
尊奉知法持戒人 從彼聞法得聖道  
實知自他身法性 知諸眾生實性身  
獲得淨勝妙法身 不受分段身離染  
常受定中禪悅食 不以段食益威光  
順世受食非力資 法命滋養成甘露  
常獲聖行善寂靜 解脫貪瞋癡染聚  
密護戒學無順違 寧捨己身不造罪  
神力能往俱胝刹 隨應現身而說法  
世間瞻覩妙相身 彼皆獲得身高勝  
身放光明妙清淨 廣照無邊諸刹土  
光照福勝軟觸生 眾生悉除煩惱害  
地獄眾生常受苦 蒙光照觸得快樂

身意調暢酸楚停  
如是及餘諸身業  
能開佛事調伏門  
語言妙音淨悅意  
凡所說法果不虛  
語言隨墮語過失  
眾生語業及音聲  
相續平等真實說  
凡所說言誠實行  
語言甘美貪止息  
甚深無底斷除癡  
此所說言無分別  
應眾生根歡喜生  
善修意業常無障  
不起滅定現威儀  
聲聞緣覺不能測  
不生自他損害心  
菩薩隨世善覺知  
不入滅定證樂門  
聞法所行智常住  
清淨諸障煩惱除  
菩提分法無邊量  
智常隨住止觀中  
乃至道樹成智果  
菩薩得定名自說  
一切善道淨勝上  
一切善法超勝高  
坐菩提場善畢竟  
積諸善法等須彌

由斯得離地獄苦  
隨智無邊善殊妙  
菩薩身業此清淨  
天人世間聞皆喜  
此法能成甘露滅  
清淨福智善能斷  
普令同等皆歡喜  
言無濁亂皆如實  
智隨諦轉善清淨  
攝功德語瞋解脫  
於千剎中作善利  
不假勤力隨解脫  
此智所作語清淨  
一剎那心世悉知  
魔不能知菩薩意  
菩薩甚深心意道  
無高無礙智平等  
無受無思無伺察  
無邊辯才總持具  
念定無亂住等引  
極微瑕穢悉不見  
悉能普攝離放逸  
十地次第今成證  
若具十種法清淨  
現修諸行淨圓滿  
隨諸地位淨諸度  
相好殊妙圓福果  
染法勝怨悉能斷  
不思議光淨成就

得是三摩地獲福  
如日光明照世間  
菩薩當坐道樹已  
能於百佛剎土中  
諸佛皆來施無畏  
悉能已伏諸魔軍  
獲此身心勝功德  
此功德門若欲修  
爾時世尊復告海意菩薩摩訶薩言海意以  
是緣故若諸菩薩欲得如自說淨印三摩  
地法門及自說無垢慧者當住二種之心一  
者無濁亂心二者無滓穢心無濁亂心者謂  
心自性清淨明亮而不容受客塵煩惱法性  
常住本自光明一切作意無所積集無塵故  
離貪無分別故離瞋無我故離癡清淨遍淨  
畢竟無垢自在光明如所解脫一切法亦然  
隨住真如平等故如所解脫一切法亦然隨住  
法界平等故如所解脫一切法亦然隨住實際  
平等故如所解脫一切法亦然隨住空平等  
隨住無相無願無造無作無生無起諸平等故  
如所解脫有為法亦然隨住無為法平等故即  
此隨住平等之法無集無散非智所知此說  
名為無濁亂心即以此法為他眾生及餘補  
特伽羅顯明開示於自他法不起動亂之想  
此即是為無滓穢心海意具是無濁亂心無  
滓穢心者即能獲得自說淨印三摩地門  
爾時海意菩薩白佛言世尊此三摩地而極  
甚深佛言不得涯底故海意又言世尊此三  
摩地而極難見佛言離二法故又言世尊此

三摩地極難覺了佛言無我所故又言世  
尊此三摩地而極難知佛言識智二法平等  
知故又言世尊此三摩地而無濁亂佛言得  
無礙解脫故又言世尊此三摩地而極微妙  
佛言離諸譬喻故又言世尊此三摩地而極  
精實佛言得金剛喻智故又言世尊此三摩  
地而不破壞佛言先後不破故又言世尊此  
三摩地悉無所著佛言一切有著隨超越故  
又言世尊此三摩地得大光明佛言離諸癡  
暝故又言世尊此三摩地而極清淨佛言畢  
竟無染故又言世尊此三摩地本性無垢佛  
言離貪塵故又言世尊此三摩地而無所行  
佛言三界無行故又言世尊此三摩地而無  
戲論佛言超越戲論故又言世尊此三摩地  
無動佛言畢竟寂靜故又言世尊此三摩地  
隨入一切處佛言與虛空等故  
爾時海意菩薩復白佛言世尊若如是者何  
能發起勝行云何當獲自說淨印三摩地門  
佛言海意譬如有人欲與虛空而共戰敵時  
彼虛空乃被甲冑菩薩亦復如是欲得自說  
淨印三摩地者應當被於諸法平等甲冑莊嚴  
何以故海意隨有所滅即有所起又復海意  
識種子是有為無表種子是無為此三摩地非  
眼識所知非耳鼻舌身意識所知此三摩地  
不可表了應知無知亦非無知此三摩地無表  
了相於一切法平等覺了故此名三藐三佛陀  
又復海意我不見有法是染相故成等正覺亦  
不見有法是淨相故成等正覺若有相是染即  
彼相是淨所謂自性清淨相故若彼自性清

淨相者，即是無相。若其無相，即無行相。若無行相，即無少法，而可表了。由無表故，即一切法無所了知。若法無能表及無所表故，是中即無文字集現。若無文字，可集現者，即所說如此復何名，即所說如。謂後如於前，中亦復然。此即是名一切諸法三世皆空。復何名空，所謂無作，即此無作，亦復無作，亦非無作。是故此說名之為空。所言無作，義復云何。無作者，謂無現前諸行造作。以無少法可造作故，是故此說名為無作。復何名為無現前行，謂無身現前行。語現前行，心現前行故。此說名無現前行。若無現前行，彼即無為。若其無為，即無生無滅，亦無處所。即此無生無滅無處所法，亦復無處。何名無處，所謂現前諸行無處，是故此說名為無處。所以者何，所謂識不住色中，不住受想行中。若識無所住，即是正智。而彼正智，即智無領納。若智無領納，即無增上意樂。若無增上意樂，即無諍論。若無諍論，即無動亂。若無動亂，即無逼惱。若無逼惱，即無燒然。若無燒然，即得止息。若得止息，即住遍寂。若住遍寂，即住近寂。若住近寂，此即名為得大寂默。是故前言智無領納，是佛所說海意。此法甚深難見難解。若有得聞如是之法，生信解者，是人所有一切顛倒煩惱執著纏縛等法悉得解脫。即能任持過去未來現在諸佛世尊法藏。為大導師，開示一切眾生無量正道。為大醫王，善療眾生一切無相煩惱之病。是為能以廣大供養普供如來。不久當得自說淨印三摩地門。所作決定。於此大乘法中能善積

集。為大法船。而能濟渡無量眾生。出生死海。為大正士。降伏諸魔。永不復隨魔境中語。

爾時海意菩薩白佛言。世尊。菩薩云何而能降伏一切魔怨。佛言。海意。若菩薩以無所為心。能於一切普攝受者。而彼菩薩即能降伏一切魔怨。又若菩薩以無所為心。於彼一切所緣相中能發起者。而彼菩薩即能降伏一切魔怨。海意。當知魔有四種。何等為四。一者蘊魔。二者煩惱魔。三者死魔。四者天魔。若或伺察幻法。即能降蘊魔。安住空法。能降煩惱魔。伺察無生無起之法。能降死魔。俱時依止一切意法。趣向滅道。能降天魔。又復知苦能降蘊魔。斷集能降煩惱之魔。證滅能降死魔。修道能降天魔。又復伺察諸行。是苦能降蘊魔。伺察諸行無常。能降煩惱魔。伺察諸法無我。能降死魔。伺察涅槃。寂靜能降天魔。又復菩薩內斷煩惱垢。而不忘失大菩提心。行於布施。即能攝伏蘊魔。若菩薩不惜其身。亦不繫著行布施已。而能迴向於一切智。即能攝伏煩惱之魔。若菩薩能念財富無常。我當與彼一切共用。真實施與。如是施已。而能迴向於一切智。即能攝伏死魔。若菩薩於一切眾生所。而不越失大悲之心。以解脫慧。普攝眾生。行布施已。而能迴向於一切智。如是即能攝伏天魔。佛說海意菩薩所問淨印法門經卷第五

佛說海意菩薩所問淨印法門經卷第六

西天譯經三藏朝散大夫試鴻臚卿傳梵大師賜紫沙門臣法護等奉 詔譯

復次海意。若菩薩雖生諸趣。無所希望。善護戒行。即能降蘊魔。若我見無依止善護戒行。能降煩惱魔。若以淨戒。令諸眾生出離老死。自護戒行。能降死魔。若起是念。我令一切毀禁眾生。皆悉安住聖淨戒中。自護戒行。能降天魔。又復菩薩於我無所得。修行忍辱。能降蘊魔。於眾生無所得。修行忍辱。能降煩惱魔。於生死無所得。修行忍辱。能降死魔。於涅槃無所得。修行忍辱。能降天魔。又復菩薩身寂靜。故發起精進。能越蘊魔。心寂靜。故發起精進。能越煩惱魔。了達無生無起。故發起精進。能越死魔。於生死中未嘗懈倦。成熟眾生。攝受正法。發起精進。能越天魔。又復菩薩蘊無依止。而修於定。能越蘊魔。界無依止。而修於定。能越煩惱魔。處無依止。而修於定。能越死魔。於餘禪支。亦悉一一迴向菩提。能越天魔。又復菩薩能以正慧。善知諸蘊。能降蘊魔。善知諸界。能降煩惱魔。善知諸入。能降死魔。雖善知緣生。而於實際。亦不取證。能降天魔。又復菩薩解諸法空。即彼蘊魔。伺不得便。意能信順。諸法無相。即煩惱魔。伺不得便。知一切法無所造作。無願。即彼死魔。伺不得便。知一切法無所造作。亦無疑惑。然於善行。心不厭足。即彼天魔。伺不得便。又復菩薩隨觀身中身念處。而修。亦不與身俱起於尋求。能破蘊魔。隨觀受中受念處。而修。亦不與受俱起於尋求。能破煩惱魔。隨觀心中心念處。而修。亦不與心俱起於尋求。能破死魔。隨觀法中法念處。而修。亦不與法俱起於尋求。於菩提意。亦無所動。能破天魔。





心菩薩雖復說法，未得無畏亦復如是。又舍利子，如摩尼寶經治瑩者，清淨明亮人所愛樂，具修勝行菩薩亦復如是，獲得無畏而善說法。一切眾生皆生忻樂，又舍利子，如江湖中所出小寶亦不可輕，何以故？是寶雖小，若在房舍或復閭中，能以光明普遍照耀，初發心菩薩亦復如是，勿生輕慢，何以故？而是菩薩得菩提已，能於一切佛剎土中，普放光明，廣大照耀。又舍利子，譬如無價大摩尼寶，最極殊妙，離諸塵垢，不退轉菩薩亦復如是，離諸慢心。又舍利子，譬如世間穀稼成熟，實穗垂穠，菩薩亦復如是，所修善法得圓滿已，於諸眾生謙下無礙。又舍利子，譬如世間劫火歟起，而此大地一切草木燒蕪無餘，菩薩亦復如是，智火若然，一切煩惱種子習氣悉蕪無餘，既滅盡已，然後乃證阿耨多羅三藐三菩提果。又舍利子，譬如如有火，若小若大，燒三千界，而虛空性本自如是，菩薩亦復如是，若有菩薩成等正覺，若無菩薩成等正覺，而一切法自性如是，舍利子，如是等諸有譬喻，如來所說而能攝受諸菩薩眾，若有菩薩聞此說已，生勝解者，而能於彼一切喻中悉得成就，當佛說是見邊法時，會中有二萬四千人發菩提心，爾時世尊重說頌曰：

難得最上佛菩提 深妙無垢無所有  
若人於此欲圓成 是中勿當生疑惑  
淨妙智慧無虛假 真實光明普照耀  
安住無垢妙印中 此佛菩提能觀見  
心自性淨而明亮 前際後際亦復然

煩惱染污意中時 應當勿離深固意  
是中無作無受者 諸法自在無主宰  
無我人故說無我 如空如夢無自性  
當觀此法非身業 非語非心所分別  
無為實性異想無 譬喻言詞不能說  
與虛空等自性淨 非色相故不可觀  
非眼耳鼻識所知 非舌非身亦非意  
遠離非相非無相 無依寂靜湛如月  
非意亦非心所行 非識非想非思度  
此非智業可能知 云何識心而曉了  
由佛無上大悲心 假以文字而說法  
眾生先世勝行業 為善知識所攝受  
如是相中聞法已 獲無等喜無愛著  
非彼諸魔伺得便 不能知心及境界  
隨何所作何所行 而彼魔業不能勝  
菩薩超越四魔已 如理如教修福慧  
善住諸佛境界中 此名修勝菩提者  
眾生不能知所行 修菩提者所行勝  
施設多種行門中 隨彼彼相為說法  
如是世間種種行 互相所緣而和合  
大智了知諸行中 隨所宣說無間斷  
或有眾生多貪染 或復多瞋悉了知  
見瞋煩惱逼迫時 彼癡性中起諸害  
如是世間種種行 菩薩隨了而能入  
行相所緣及緣成 隨其相言為宣說  
譬如周遍置繩網 大智持明者善知  
普遍能破諸網已 隨意所觀出無礙  
菩薩勇智亦如是 世間心意悉能入  
普使令諸煩惱除 周遍所行無覆障

如日舒光無援助 蛇毒亦無於等侶  
師子振吼亦復然 菩薩所修無助伴  
菩薩單己而無二 精進勢力悉具圓  
精進勢力悉具圓 摧滅世間諸煩惱  
譬如如有火得乾薪 隨處增長其勢力  
菩薩增長慧光明 悉能照破諸煩惱  
爾時世尊復告海意菩薩摩訶薩言，菩薩若能發起精進，常所堅固勤行樂欲，所起精進無有休息，而諸菩薩即於阿耨多羅三藐三菩提不為難得，何以故？海意，由精進故，乃得菩提。若懈怠者，於佛菩提遠中復遠，無懈怠者能行布施，無懈怠者而能持戒，無懈怠者能起精進，無懈怠者能修禪定，無懈怠者能集智慧，無懈怠者能行自利，無懈怠者而能利他，以是緣故，汝今當知，菩薩若能發起精進，彼諸菩薩乃於阿耨多羅三藐三菩提不為難得。海意，我念過去世中，大阿僧祇劫前，彼時有佛出現世間，號勇猛精進如來，應供正等正覺，明行足善逝世間解無上士調御丈夫，天人師佛世尊，世界名善見，劫名花積，以何緣故，劫名花積，海意，是時三千大千世界大水充滿，水中復出八萬四千廣大蓮花，花有無數俱胝那庾多百千葉，殊妙可愛，觀者悅意，爾時淨居天眾見是花已，咸生歡喜，意樂適悅，俱發是言，若此蓮花廣大出現，決定當有正等正覺出此劫中，此劫不空，有佛世尊出現於世，猶如花積，是故此劫名為花積，又復何緣而彼世界名為善見，以其世界最勝清淨，十方一切諸佛剎中，無量無數諸

菩薩眾咸悉往詣於彼世界而共瞻仰。當瞻仰時一切大眾於彼世界皆得喜相。三摩地一切妙樂皆悉具足。於彼世界所觀善妙故名善見。海意此善見世界七寶所成。有眾寶樹及寶樓閣。是寶光明普遍照耀。而彼世界無有女人不受胎藏於蓮花中自然化生。加跏趺而坐。又其世界無有餘乘。諸修行者唯住大乘。其土人民諸所受用如兜率天。須飲食者悉得如意。復得神通遊戲。履虛空。彼勇猛精進如來法中。有二十六俱胝出家菩薩。具菩薩道入菩薩眾。復有無量在家之眾。修大乘行。是時彼佛為諸菩薩宣說勤行精進之法。彼佛告言。汝諸大士當勤精進。常所堅固深極勤勞。深極樂欲。無令休息。海意。其佛會中有一菩薩名堅固鎧。從座而起。白其佛言。世尊。云何菩薩能發精進。復以何法。如來教授諸菩薩眾。時勇猛精進如來告堅固鎧菩薩言。善男子。所謂精進有其四種。而能普攝一切善法。何等為四。一者發起。二者動作。三者伺察。四者修行。如是四種而能普攝一切善法。又復云何名為發起。何名動作。何名伺察。何名修行。善男子。發起者所謂發起大菩提心。勤作者廣大積集一切善根。伺察者於諸眾生作利益事。修行者隨何等法。悉住於忍。又發起者勤求多聞。勤作者如聞能說。伺察者深固作意。修行者起聖正見。又發起者攝止慳心。勤作者捨諸所有。伺察者所有善利與一切眾生共之。迴向菩提。修行者不求果報。又發起者振大捨聲。勤作者諸來求者起善

知識想。伺察者諸所受用觀無常分。修行者施已無悔。又發起者諸所受用依法而求。勤作者淨命自資。伺察者行真實施。修行者施時不起意念。又發起者滌破戒垢。勤作者禁戒無缺。伺察者破戒眾生而將護之。修行者雖具戒德不起意念。又發起者身業清淨。勤作者語業清淨。伺察者心業清淨。修行者諸法清淨。又發起者諸有瞋心而不容受。勤作者忍力發現。伺察者自他作護。修行者雖住忍辱不起意念。又發起者諸有忿恚皆令歡喜。復得清淨。勤作者令諸忿恚歡喜和合。伺察者內心清涼而無熱惱。修行者自他無所得。又發起者遣除懈怠。勤作者於精進力而善決擇。伺察者懈怠眾生而救護之。修行者隨何等法皆住於忍。又發起者積集善法。勤作者成辦善法。伺察者不樂餘乘。修行者不壞諸業。又發起者念。勤作者行。伺察者慧。修行者住。又發起者理。勤作者教。伺察者門。修行者出離道。又發起者積集文字。勤作者文義總持。伺察者若聲若文皆悉不著。修行者覺了諸法悉不可說。又發起者親近善友。勤作者遠離惡友。伺察者於善惡友起心平等。修行者如所說言隨能憶持。又發起者起出家心。勤作者於愛非愛所觀平等。伺察者隨何等善悉樂希求。修行者得現量智。又發起者樂居曠野。勤作者遠離憤鬧。伺察者樂處寂靜。修行者修寂靜行。又發起者少欲。勤作者知足。伺察者獲得妙樂。修行者知所應量。又發起者修增上戒學。勤作者所修無雜。伺

察者修增上心學。修行者修增上慧學。又發起者布施。勤作者愛語。伺察者利行。修行者同事。又發起者大慈。勤作者大悲。伺察者大喜。修行者大捨。又發起者剎土清淨。勤作者相好圓滿。伺察者護持正法。修行者救度眾生。又發起者了知蘊魔。勤作者越煩惱魔。伺察者遠離死魔。修行者摧伏天魔。又發起者知苦。勤作者斷集。伺察者修道。修行者證滅。又發起者修身念處。勤作者修受念處。伺察者修心念處。修行者修法念處。又發起者信。勤作者精進。伺察者念定。修行者慧。又發起者防斷不善之法。勤作者圓滿生起一切善法。伺察者若身若心輕安調暢。修行者獲得無加行神足。又發起者修七覺分。勤作者行八正道。伺察者修習止觀。修行者得明解脫。又發起者發起諸行。勤作者表示潔白之行。伺察者心得輕安。修行者不轉境界相智。復次海意。彼勇猛精進如來。復告堅固鎧菩薩言。善男子。由精進故身心輕安。即此精進若因若見悉當遠離。又此精進能知名色。又此精進能滅我所見。又此精進能解所取之縛。又此精進能除五蓋。及現所起一切煩惱。又此精進能斷惡作及彼疑惑。又此精進破諸結病。又此精進而能勤力除斷諸障。又此精進離慢過慢。又此精進超越一切所依所著。又此精進離諸喜恚。又此精進於無明有愛悉不染著。又此精進於貪瞋法而悉不行。又此精進於其癡法而常伺察。又此精進知覺內外十二處法。又此精進了知五蘊及

十八界本來不生，又此精進心住寂靜，遍寂近寂，又此精進決了諸法，悉無所得，又此精進於一切法不取二相，又此精進了知法性本來常住，又此精進知一切法不來不去，又此精進知一切法無取無捨，又此精進知一切法無作無止，又此精進知一切法無高無下，又此精進知一切法不出不入，又此精進知一切法無縛無解，又此精進知一切法無勤無墮，又此精進知一切法無放逸無不放棄，又此精進知一切法無能作無所作，又此精進知一切法無觀無不觀，又此精進知一切法無止息無熾然，又此精進知一切法無所護無不護，又此精進知一切法無集無散，又此精進知一切法無海意，彼勇猛精進如來，為諸菩薩說如是等勤行精進法時，會中有一萬人得無生法忍，堅固鎧菩薩於彼佛所得聞如是精進法已，轉復發起精進勤求善法，如是精進常無休息，經俱胝歲，過是已後得柔順忍，如是精進勤求善法，經爾所時，即於彼滅滅已，還於彼如來前重復化生，聽受宣說大集會正法，又復精進勤求善法，海意其堅固鎧菩薩以是緣故，經爾許時，普遍親近八萬四千佛，於彼花積劫中，發起精進勤求善法，經如是時一切勤行，海意汝今勿生疑念，是時堅固鎧菩薩者，豈異人乎，即我身是，我昔曾歷多菩薩位，棄背生死勤求菩提，乃至我今得成正覺，廣行精進深歷艱苦，況復世間懈怠眾生起下劣精進者，而能獲得菩提果邪，海意若諸眾生能發精進者，於我法中即得清淨，非懈

怠者而能成就，以是緣故，汝今當知諸有精進不放逸者，即得菩提，當佛說是過去所行精進法時，會中有五千菩薩得無生法忍，七千天人發阿耨多羅三藐三菩提心。

佛說海意菩薩所問淨印法門經卷第八

譯經三藏朝散大夫試鴻臚卿光祿  
大師賜紫沙門臣惟淨等奉 詔譯

爾時世尊重說頌曰

號曰勇猛精進尊

我念過去佛出世

最上世界名善見

劫名花積妙可觀

有佛出現彼劫中

八萬四千蓮花出

所須飲食皆如意

世界猶如兜率天

眾生化生悉嚴好

彼無女人不處胎

菩薩皆住大乘法

而復不修於餘乘

於彼世界善可觀

十方所來菩薩眾

受諸快樂未曾有

皆獲喜相妙定門

是眾莊嚴二足尊

菩薩俱胝二十六

最上佛乘皆安住

復有餘多天及人

數數宣說精進門

其佛大仙智德海

於佛發問如斯義

有菩薩名堅固鎧

菩薩云何精進修

所欲安住精進力

我於是中修行住

此義願佛為我宣

為說發勤精進德

彼大法王知意已

常所伺察修行住

發起勤作行相應

勤作成辨眾善法

發起所謂菩提心

修行隨何法住忍

伺察利益諸眾生

勤作宣說而開明

深固作意伺察門 修行謂起聖正見  
發起滌除於慳垢 捨諸所有是勤作  
具菩提心伺察門 修行所作不求報  
發起謂振大捨聲 慈於巧者是勤作  
伺察受用觀無常 修行施已不生悔  
依法所受名發起 淨命自資是勤作  
我真實施伺察門 修行施時無意念  
發起滌除破戒垢 禁戒無缺是勤作  
伺察將護破戒人 修行具戒無意念  
發起所謂身業淨 語業清淨是勤作  
心業清淨伺察門 修行是為諸法淨  
不容受瞋名發起 忍力現行是勤作  
自他作護伺察門 修行忍辱無意念  
恚者常淨名發起 勤作於彼不捨離  
內心清淨伺察門 修行自他無所得  
發起謂除懈怠垢 擇精進力是勤作  
護懈怠者伺察門 修行隨何法住忍  
積集善法名發起 成辦善法是勤作  
伺察不樂於餘乘 修行不壞諸業報  
發起了知於正念 勤作悟入法行中  
善護正慧伺察門 修行所謂堅固住  
發起謂理勤謂教 彼諸法門謂伺察  
知出離道即修行 此發精進善方便  
發起所謂文總持 善宣說義名勤作  
不著於聲伺察門 修行了法不可說  
親近善友名發起 遠離惡友是勤作  
觀善惡性伺察門 修行憶持於諸法  
法中出家名發起 捨愛非愛是勤作  
希求善法伺察門 修行於法無障礙

發起樂居曠野中	遠離憒鬧是勤作
樂居寂靜伺察門	修行謂修寂靜行
少欲善言名發起	歡喜知分是勤作
獲受妙樂伺察門	修行謂知所應量
增上戒學名發起	所修無雜是勤作
增上心學伺察門	增上慧學修行住
布施持戒名發起	忍辱精進是勤作
禪定慧行伺察門	修行總起智方便
財法二施名發起	愛語所謂是勤作
利行是為伺察門	修行真實而同事
大慈圓滿名發起	大悲具足是勤作
法中大喜伺察門	修行此說大捨智
發起清淨佛剎土	圓滿相好是勤作
護持正法伺察門	度脫眾生修行住
不著蘊魔名發起	出煩惱魔是勤作
攝伏死魔伺察門	摧伏天魔修行住
了知苦果名發起	不立愛故是勤作
修道是為伺察門	滅智所謂修行住
發起身念處離縛	觀受念處是勤作
觀心念處伺察門	修行謂觀法念處
發起所謂信根方	精進根力是勤作
念定根力伺察門	修行謂即慧根力
防斷不善名發起	不壞善法是勤作
身心輕利伺察門	修行智起四神足
發起謂修七覺分	行八正道是勤作
修習止觀伺察門	修行真實明解脫
發起勤作起諸行	心得輕安伺察門
不轉諸相境界中	此說是為修行住
若身若心輕安故	於見於因當出離

是中名色若了知	諸聖稱讚此精進
於我我所若能滅	即解一切所取縛
現起五蓋悉蠲除	惡作疑惑皆斷滅
又復能破諸結病	此力除障無所覆
於慢過慢斷無餘	所作皆由精進力
遣除一切諸有相	止息一切諸戲論
斷滅一切煩惱因	智者稱讚此精進
聞此精進功德已	勇發精進咸稱讚
菩薩會中有十千	悉得無生妙法忍
釋迦如來此會中	為諸菩薩廣宣說
聞說精進先行時	五千菩薩忍清淨
復有天人阿修羅	緊那羅等諸會眾
爾時會中有百千	發菩提心善安住
我昔曾名堅固鎧	得最上忍菩薩位
棄捨身命精進修	經爾許時常無懈
親近八萬四千佛	棄捨己身而奉事
近侍諸佛一劫中	後居無數菩薩位
爾時大悲思惟大梵天王白海意菩薩言善男子所言佛法是何等增語海意菩薩言大梵此言佛法者是一切法增語何以故如來以無分別相如量取證菩提無分別相者即一切法平等相如來是中如量取證菩提大梵若了一切法平等即是菩提是故此說一切法即是佛法若一切法如是即佛法亦如是所有一切法自性即佛法自性一切法離故應知佛法亦離一切法空故應知佛法亦空大梵一切法緣生若能覺了諸法緣生即是菩提如來於一切法如是見而彼佛法亦如是見梵天言善男子豈非佛法越三界	

邪菩薩言大梵三界自性即是佛法何以故大梵而彼佛法平等相中無高無下猶如虛空亦無高下佛法亦復如是同彼虛空無高無下大梵一切法亦然自性空中等無高下大梵若善男子及善女人欲知佛法者應如是知然於所知方便不應取著	
復次大梵佛法無方分無處所不生不滅非青非黃非赤非白故無顯色非有形相故無形色無形顯色故即是無相大梵無相義者即佛法義佛法義者即不墮句義不墮句義者即寂靜義寂靜義者即是離義離義者即是空義空義者即無繫著義無繫著義者即實性義實性義者即真如義真如義者即畢竟不生義不生義者即不滅義不滅義者即無住處義爾時海意菩薩重說頌曰	
所說無相義 是勝佛法義 其說佛法義 即不墮句義 不墮寂靜義 寂靜是離義 離義即空義 空義無著義 無著實性義 實性真如義 真如即畢竟 不生不滅義 不滅無處義 法義如是住 如所住法界 諸法亦然住 如諸法所住 佛法亦然住 如佛法所住 生滅法亦然 無著法等義 真如無異住 聲聞緣覺法 亦平等隨住 如是處住法 佛法勝無上 無方分處所 故佛法安住 勿於生滅中 隨觀諸佛法 彼非形顯色 無少法可得 無形亦無相 佛法而開明 如諸法自性 佛法亦如是 此所說平等 無差別無相 如是求佛法 諸法亦然求 若法無所得 彼即無分別	

佛及諸佛法 一切法皆然 大仙處道場  
得平等正法 佛及諸佛法 於道場觀察  
彼所說佛法 平等故常 等無高下法  
如虛空清淨 若佛及佛智 彼佛此所說  
謂諸法緣生 自性無所有 若自性不有  
即無少法生 實際此若知 世間等無際  
是際中起智 隨轉一切法 所謂過去法  
及彼未來法 此名現在法 此是諸佛法  
如是三時中 佛智無所著 由智無著故  
牟尼乃說法 所謂佛十力 及四無所畏  
諸佛十八種 不共功德法 於是中普攝  
所有一切法 如是一切法 是即諸佛法  
復次大悲思惟大梵天王 重白海意菩薩言  
善男子 汝於如是法中云何所見 菩薩言 大  
梵 夫佛法者 墮色數邪 梵天言不也 菩薩言  
若法非色即不可見 若無對礙即無表了 是  
中云何有所見邪 梵天言不也 善男子 菩薩  
言 大梵 若佛法不可見者 即一切法亦如是  
何以故 法本無二 此無二者 即是一切法 大  
梵 若法有所見 彼即是有相 謂以無別可見  
無別佛法 若此如是見 彼如是佛法 若如是  
佛法 彼即如是見 梵天言善男子 若爾者 如  
來於一切法不復有見 菩薩言 大梵 若如來  
於佛法中有所見者 即彼如來及諸佛法有  
實定性可得 梵天言善男子 若如是者 佛法  
不有邪 菩薩言 大梵 若法無實定性 是中有  
無悉不可說 若法非有無 彼即無所見 梵天  
言 若爾 何故世尊 今此會中說佛法邪 菩薩  
言 大梵 如說虛空 非彼虛空有實定性 佛法

亦復如是 此說佛法 非彼佛法有實定性 梵  
天言 希有 善男子 若初發心 菩薩聞此說 已  
不生驚怖者 而是菩薩於佛法中被堅固 鎧  
菩薩言 大梵 若諸眾生得佛加持 已發菩提  
心者 聞此所說 甚深佛法 即不生驚怖 又復  
大梵 有取有執者 即生驚怖 無取無執者 不  
生驚怖 有依止有繫著者 即生驚怖 無依止  
無繫著者 不生驚怖 有我我所見者 即生驚  
怖 離我所見者 不生驚怖 梵天言 善男子  
菩薩有幾種力 若諸菩薩具是力者 即於如  
是甚深佛法中 不生驚怖 菩薩言 大梵 諸菩  
薩有八種力 若諸菩薩具是力者 乃於如是  
甚深佛法中 不生驚怖 何等為八 一者無障  
礙信心 於諸佛法 生勝解故 二者尊重出生  
善知識力 諦意隨順 如師尊故 三者多聞出  
生慧力 出世間法 悉圓滿故 四者福行出生  
承事之力 無量福行 悉圓滿故 五者深固作  
意 出生智力 破諸魔故 六者大慈 出生大悲  
之力 於無我法 離疑惑故 七者安定 出生善  
思惟力 大菩提心 不忘失故 八者無他 信出  
生忍力 獲得無生妙法 忍故 大梵 此等是為  
菩薩八種勝力 若諸菩薩摩訶薩 具是力者  
能於甚深諸佛法中 不生驚怖  
爾時世尊讚海意菩薩摩訶薩言 善哉善哉  
海意 汝善說此菩薩八力 若諸菩薩具是力  
者 能於甚深諸佛法中 不生驚怖 又復於佛  
法中 隨所聞已 皆不生怖 海意 當知諸說法  
聲 皆是分別 若於菩提勝義諦中 即不能說  
何以故 彼勝義諦 非語言 非詮表 亦非文字

積集所行 尚非心心所法 而可能轉 況復文  
字 有所行邪 海意 如汝所觀 諸佛世尊 有所  
說者 但為不可思議 一切眾生 大悲轉故 乃  
於如是甚深法中 成正覺已 於無文字 無語  
言 無記說 無詮表法中 為他眾生 及補特伽  
羅 假以文字 建立宣說 海意 譬如有人 知此  
虛空 非色相 故不可見 非對礙 故無表了 然  
於空中 以種種色 彩畫形像 所謂象馬車乘  
天龍夜叉 乾闥婆等 現諸色相 海意 於汝意  
云何 是人所作 斯為難不 海意 菩薩白佛言  
世尊 是人所作 最極為難 佛言 海意 諸佛世  
尊 如復為難 過極於彼 何以故 謂於不可說  
法中 成正覺已 假以言說 為他眾生 及補特  
伽羅 建立宣說 由於不可說義 中如實覺了  
是故 諸佛難作 能作 海意 若復有人 於此甚  
深佛法之中 不驚不怖 不生恐懼者 當知是  
人 於先佛所 深種善根 作諸勝行 是故 於此  
甚深佛法 不生恐懼 若復有人 於此甚深經  
典 一切世間 難信解法 如實知已 受持讀誦  
廣為他說者 當知是人 能持如來 一切法藏  
能持 一切眾生 諸善法分 又復 海意 若有菩  
薩 得佛眼 照明 能於無量 諸佛剎中 滿積珍  
寶 持用 供養 彼彼 如來 廣行 布施 於汝意云  
何 而彼菩薩 以是緣 故得福 多不 海意 白佛  
言 甚多世尊 甚多善逝 此之福蘊 無量無數  
乃至 譬喻 所不能及 佛言 海意 我今語汝 如  
汝應知 若有菩薩 能於如來 法中 善為 作護  
令三寶種 不斷不絕 於諸眾生 不捨 大悲 於  
如是等 甚深經典 如來 大智法中 能了 知已

受持讀誦。何況是中如理修行。而此菩薩所得福蘊倍多於彼。何以故。所有財施。但是世間之所愛樂。若法施者。彼即出過一切世間。復次海意。若有菩薩能護持正法者。而此菩薩得四種攝受。何等為四。一者得佛攝受。二者得天攝受。三者得福攝受。四者得智攝受。若諸菩薩得佛攝受者。當得四種最勝之法。何等為四。一者常得不離瞻仰如來。二者一切魔眾伺不得便。三者獲得無盡陀羅尼門。四者速具神力住不退轉地。海意。諸有菩薩為佛攝受者。獲得如是四種最勝之法。又諸菩薩若得天攝受者。當獲四種清淨。何等為四。一者天眾神力。令其菩薩眾會清淨。二者使令聽受正法專注一心。三者遣除一切魔外之眾。四者由天威神。能令一切無不清淨。悉得淨心。海意。諸有菩薩為天攝受者。獲得如是四種清淨。又諸菩薩若得福攝受者。當獲四種莊嚴之相。何等為四。一者身莊嚴。謂相好圓滿。二者語莊嚴。謂勝出一切眾生語言音聲。三者國土莊嚴。謂諸所施作悉能顯示。四者所生莊嚴。謂在所生處或為梵王帝釋。護世天等。海意。諸有菩薩為福攝受者。獲得如是四種莊嚴。又諸菩薩若得智攝受者。當獲四種照明之法。何等為四。一者照明一切眾生根性。如其所應。即為說法。二者照明一切煩惱之病。積集法藥。隨為治療。三者神力照明。餘佛剎中。悉能徧往。四者法界照明。於一切法如實了知。海意。諸有菩薩為智攝受者。獲得如是四種照明。以是緣故。菩薩摩

訶薩欲得如是攝受稱讚功德法者。應當勤行護持正法。若諸菩薩而能勤行護正法者。當獲無量最勝功德。

佛說海意菩薩所問淨印法門經卷第九

譯經三藏朝散大夫試鴻臚卿光祿  
大師賜紫沙門臣惟淨等奉 詔譯

爾時世尊重說頌曰

諸佛正法能護持

彼稱讚法我略宣

知諸佛恩能報者

諸佛正法能護持

佛眼照明觀佛剎

諸佛正法護持時

雖以世財供養佛

出世勝法若求時

諸佛正法護持者

諸天龍等亦攝持

諸佛正法護持者

廣大勝慧普遍知

諸佛正法護持者

惡作疑惑悉蠲除

諸佛正法護持者

一切生中見佛身

諸佛正法護持者

出家善利數能成

諸佛正法護持者

得五智通妙輕安

當得種種善稱讚

如大海中水一滲

諸佛付託持法藏

是即普供十方佛

妙寶供養諸世尊

比前福蘊此最勝

不能解脫世間行

智者出離世間法

即得諸佛所攝受

福攝智攝皆獲得

得念慧行悉具足

智者拔除煩惱種

非彼諸魔伺得便

彼無諸障亦無縛

所生剎土不空過

見已即得心清淨

獲得宿命大智法

所修真實清淨行

戒聞勝生諸梵行

禪定解脫悉無礙

諸佛正法護持者 趣入甚深諸法中  
佛境界空無所疑 信解眾生無我法  
諸佛正法護持者 獲無礙解捷利慧  
得無礙言無畏門 破諸眾生疑惑網  
諸佛正法護持者 得大總持勝善利  
不能聽受百劫中 由具辯才悉無礙  
諸佛正法護持者 得諸智者常稱讚  
天阿修羅等悅心 諸佛讚護如佛子  
諸佛正法護持者 及彼人中轉輪王  
諸佛正法護持者 乃至菩提勝妙樂  
大智圓成無壞身 具三十二殊妙相  
諸佛正法護持者 一切觀者無厭足  
彼為宣明法印門 得善知識亦非難  
諸佛正法護持者 聽受無盡正法藏  
戒定慧淨亦復然 身語心業皆清淨  
諸佛正法護持者 得解脫智善清淨  
波羅蜜行不棄捐 常不捨離菩提心  
諸佛正法護持者 而能普攝多善法  
正使住壽一劫中 若廣稱讚彼功德  
亦不能說其邊際

爾時會中有一菩薩名功德光王。從座而起。前白佛言。世尊。如佛向者。作如是言。我於不可說法中。而成正覺。世尊。若法不可說。何故今言護持正法。佛言。如是如是。善男子。如汝所言。我於不可說法中。而成正覺。然善男子。不可說者。謂以世俗文字語言。於無為法中。而不可說。若以文字語言。詮總持門。施設建立。顯明開示。乃有所說。此即是為護持正法。又善男子。有說法師。於如是等甚深經中。廣大受持。為他

演說如理修行者。若人能於此法師所恭敬  
尊重承事。種種供養密為護持。飲食衣服坐  
臥之具。病緣醫藥。善作供施。能護善法。善護  
語言。於非語言而為藏覆。此即是為護持正  
法。又善男子。若有人能解了於空。信順無相  
無願無求。於無加行中真實安止。此即是為  
護持正法。又善男子。若有人能於自所說無  
諍勝語。及他所說非法語言。是二同於法中  
所攝。此即是為護持正法。又善男子。若人能  
以無障礙心。相續普攝一切眾生入解脫慧  
中。不以世間財利之心為他法施。此即是為  
護持正法。又善男子。若有人能棄捨身命。於  
如是等甚深經典密為作護。居寂靜處依法  
修行。此即是為護持正法。又善男子。若有人  
能為聽法因緣。或為說法因緣。乃至行於一  
步。或一出入息間能專注者。此即是為護持  
正法。又善男子。若了<sub>レ</sub>一切法無所護無所取。此  
即是為護持正法。復次功德光王。如是等緣  
汝應當知。善男子。我念過去阿僧祇劫。復過  
阿僧祇劫數之前。彼時有佛出現世間。名大  
智力聲如來。應供正等正覺。明行足善逝世  
間解。無上士調御丈夫。天人師佛世尊。世界  
名淨光劫名喜上。善男子。彼淨光世界琉璃  
所成。廣博清淨光照十方。彼有清淨諸大菩  
薩摩訶薩眾。依止遊戲大神通力。從甚深法  
之所出生。彼菩薩眾諸所受用。皆如化樂天  
子。悉以天子之狀。於彼佛所聽受說法。無復  
在家出家種種形相。時彼大智力聲如來。常  
為彼會諸菩薩眾。廣大宣說護持正法。作如

是言。汝等善男子。應當勤行。不惜身命護持  
正法。時彼會中有一菩薩摩訶薩。名曰法語。  
白彼世尊。大智力聲如來。言。世尊。云何是諸  
菩薩能護正法。又復云何是所護法。彼佛告  
言。善男子。若於色心境界之中。善護諸障。專  
注一境。調伏止息。住寂靜法。此即是為護持  
正法。何以故。眼根色境。眼識。此三非法。非  
法故。耳根聲境。耳識。鼻根香境。鼻識。舌根味  
境。舌識。身根觸境。身識。意根法境。意識。非法  
非非法故。若能了知眼色空已。即眼及色無  
所分別。眼識無住。此即正法。菩薩若於如實  
智中。善令他得如是法者。此即是為護持正  
法。如是耳聲鼻香舌味身觸意法。了知空已。  
即意及法無所分別。意識無住。此即正法。菩  
薩若於如實智中。善令他得如是法者。此即  
是為護持正法。又善男子。若有法於諸法中而  
可轉者。彼法即無所護無所取。如是解者。此  
即是為護持正法。又復於諸見中。依止邪見者。  
彼見即無所護無所取。如是解者。此即是為  
護持正法。又復以其無智癡障。故心不清白。  
若彼無智癡障中。無所護無所取。如是解者。  
此即是為護持正法。又善男子。若法有集有散。  
即非法非律。若無集無散。即是法是律。何等  
法集散。謂有為道。諸法集散。若非法非律。何  
無集無散。是故當知。若無取即無生。由無生  
即無集亦無散。以無集無散。故即是法是律。  
何者是法。是律。謂自性不生。諸煩惱等不令  
生起。此即名為是法。是律。若是法是律。故。即  
不生不滅者。即是無盡。此無盡者。即是無生

法律。如是無生法。乃無所護。此無所護。是即  
真實護持正法。復次功德光王。彼大智力聲  
如來。說是法時。彼眾會中。三萬二千菩薩。得  
無生法忍。法語菩薩。於彼佛所得聞法已。心  
意快然。踊躍歡喜。前白佛言。稀有世尊。善說  
如是護持正法。甚深法門。世尊。如我解佛所  
說義。如我所得。即一切法無法。若無法。即有  
法。何以故。世尊。若一切法有所取著。即無法。若  
無所取著。即有法。以法與非法二想。於一切  
法中。無法非法二想。可知。世尊。一切法與非法。  
若於勝義諦中。即無法可得。亦無非法可得。  
由無法想。亦無非法想。故。即無法可數。以無  
法可數。故。即住實際。若住實際。即是無際。何  
以故。虛空際。即是諸法實際。以其虛空無所  
從來。是故無際。如虛空無所從來。故無際。諸  
法亦然。無所從來。故亦無際。乃說諸法。即虛  
空際。世尊。若有菩薩。得聞如是實際法已。如  
實解者。彼即了達諸法。無有一相。世尊。我不見  
有少法可得。若法無所有。是故我說護持正  
法。又復世尊。我說此法時。契順如來所說語。  
不是法語。不。法隨法說。我為正說。不。佛言。善  
男子。如汝所說。真實契順如來之語。是實法  
語。法隨法說。是為正說。復次功德光王。彼法  
語菩薩。說是法時。彼天子眾中。有十千天子。  
得柔順法忍。功德光王。汝勿生疑念。彼時法語  
菩薩者。豈異人乎。即汝功德光王。是。汝今於  
此大眾會前。勸請於我。是故我今。以彼阿僧  
祇俱胝劫中。積集阿耨多羅三藐三菩提法。  
付囑於汝。汝當受持。廣為他說。宣演流布。

爾時世尊說是法已。而此會中有六十俱胝大菩薩眾悉住佛前。異口同音咸作是言。世尊。我等願為護持。如來菩提正法。廣演流布。佛告諸菩薩言。諸善男子。汝等修行住何法已。乃於如來阿僧祇俱胝劫。積集菩提之法。而為護持。爾時會中有菩薩。名山自在。王前白佛言。世尊。若護惜身命。斯即不能護持正法。我不惜身命故。如是乃能護持正法。

吉祥峯王菩薩言。世尊。若於利養有所希求。斯即不能護持正法。我於名聞利養等事而悉棄捨。非聖所許。亦悉遠離。如是乃能護持正法。大幢菩薩言。世尊。若法非法有其二想。斯即不能護持正法。若離一。想得法平等。如是乃能護持正法。勝密菩薩言。若煩惱病之所逼迫。斯即不能護持正法。我得諸聖智慧之力。勝伏煩惱。如是乃能護持正法。持炬菩薩言。世尊。若處癡暗境界之中。斯即不能護持正法。我得無礙智光離諸癡暗。如是乃能護持正法。電天菩薩言。世尊。法中若起比量智者。斯即不能護持正法。我已證得現量之智。於諸法中不起他信。如是乃能護持正法。

普密菩薩言。世尊。若世俗根性及散亂心。斯即不能護持正法。我於諸根諸門諸處。善調深密。如是乃能護持正法。淨光菩薩言。世尊。若眾生法有種種性及種種想。斯即不能護持正法。我於一切眾生起平等心。及一切法亦得平等。如是乃能護持正法。最勝步菩薩言。世尊。若起散亂非等引心。斯即不能護持正法。我住等引不散亂心。如是乃能護持正法。

導師菩薩言。世尊。若不了知正道之法。修行邪道。斯即不能護持正法。我已了知正道智慧。邪道眾生置如實道。如是乃能護持正法。善慧菩薩言。世尊。若猶豫心起於分別。斯即不能護持正法。我今已離猶豫之心。斷諸分別。復令一切眾生得除疑惑之病。如是乃能護持正法。遍照菩薩言。世尊。若住非法壞修行道。斯即不能護持正法。我住正法真實修行。復置一切眾生皆住如實道中。如是乃能護持正法。明觀菩薩言。世尊。若具染慧離法光明。斯即不能護持正法。我得決定慧圓善巧智具法光明。如是乃能護持正法。

無礙慧菩薩言。世尊。若有礙心不能隨護眾生之慧。斯即不能護持正法。我以無障礙心隨護眾生。令住勝慧。如是乃能護持正法。行淨慧菩薩言。世尊。若不善解諸眾生根。又不能知諸眾修行。斯即不能護持正法。我於一切眾生根行智解入已。如是乃能護持正法。莊嚴王菩薩言。世尊。於法若有分別之想。依止我人及依止法。斯即不能護持正法。我於一切分別非分別。悉離遍計。三輪清淨。無我無人無法依止。亦無造作。如是乃能護持正法。

師子幢菩薩言。世尊。世間眾生聞一切法無生無起。咸皆驚怖。斯即不能護持正法。我已了知一切法無生無起。無復驚怖。不見有法。若近若遠。如實住已。如是乃能護持正法。慈氏菩薩言。世尊。若於菩提起懸遠想。斯即不能護持正法。若有菩薩作是思惟。我雖得阿耨多羅三藐三菩提。而不見菩提。若身若心

有所和合非不和合。彼菩薩者如是乃能護持正法。功德光王菩薩言。世尊。若住非功德離真實功德。不求如來勝功德者。斯即不能護持正法。我已遠離諸非功德。安住菩薩真實功德。勤求如來最勝功德。如是乃能護持正法。妙吉祥菩薩言。世尊。如世狂亂之人。作如是言。我能護持如來正法。此非誠信。所以者何。如佛世尊坐道場時。無法可得。亦無所證。是中云何有法可護。世尊。我於一切法都無所護。離諸執著。而以大悲持諸法性。然於諸法無所成辦。非不成辦。爾時世尊讚妙吉祥童真菩薩言。善哉善哉。妙吉祥。如是如是。如汝所說。我坐道場時。無少法可得。無所得時。乃是言處於道場。妙吉祥白佛言。世尊。為於何時坐道場邪。若有所坐。即於菩提而有所得。斯乃有二對礙。有別菩提。有別世尊。謂以佛及菩提無二對礙。故佛言妙吉祥。菩提場自性。我了達已。是故我乃坐菩提場。以我自性。即是菩提場自性。而菩提自性。即一切眾生自性。彼一切眾生自性。即一切法自性。妙吉祥。同一自性等一味。故我於菩提場成正覺時。觀菩提場。無有少法而不解脫。謂以菩提平等故。現證諸法。而亦平等。然平等法中。不墮諸數。數與非數。皆悉離故。彼平等法是。故如來說名無為。妙吉祥。如來得是無為。超越一切有為之法。如來說是法時。妙吉祥菩薩深生信解。及一切眾會信解。如來解脫之法。由信解故。普遍皆於平等法中。無所違越。

爾時無量功德寶無垢殊妙莊嚴世界。先同

①已(●)已(◎) ②大集9卷58下3:如來若坐菩提樹下。如來世尊則有二相。一者如來二者菩提。如來世尊已離二相 ③同前9卷58下9:而是平等不入於數。

海意菩薩來此娑婆世界。諸大菩薩摩訶薩。眾聞是法。已心意快然。踊躍歡喜。咸皆忻樂。俱發是言。我等來此佛剎。快得善利。見佛世尊。又見妙吉祥童真大士。得聞說此甚深正法。見佛出世。見此正法現住世間。轉大法輪。世尊。若此正法所在之處。廣流布者。彼諸眾生。得大善利。又若有人。於佛在世。或涅槃後。而能聽受如是正法。聞已。信解受持。讀誦。廣為他說。當知是人。得大利益。佛言。諸善男子。如汝所知。菩薩善得幾種大利。彼菩薩白佛言。世尊。菩薩善得十種大利。此即不思議善利所轉。何等為十。所謂一者。值佛出世。而能親近。得此大利。二者。得見佛已。深心清淨。三者。起清淨心。聽受正法。四者。聞正法已。離諸疑惑。五者。離疑惑已。於中出家。六者。既出家已。淨命自資。七者。淨命資。故能善說法。八者。善說法已。發菩提心。九者。由不忘失菩提心。故。而能聽受菩薩藏法。十者。聞菩薩藏甚深法已。依法修行。得此大利。世尊。如是等法。是為菩薩十種大利。此即不思議善利所轉。若諸菩薩如是住者。此即說名善得大利。

佛說海意菩薩所問淨印法門經卷第九

西天譯經三藏朝散大夫試鴻臚卿傳  
梵大師賜紫沙門臣法護等奉 詔譯

爾時海意菩薩摩訶薩。白佛言。希有世尊。多所饒益。修大乘者。一切眾生。謂諸天人。雖受天人中樂。乃能親近。無上涅槃。最勝妙樂。世尊。有幾種法。而能隨轉。攝受大乘。復有幾法。於大乘中。而能多作。復有幾法。於大乘中。而極難作。復有幾法。增長大乘。復有幾法。於大乘中。而為障礙。世尊。復以何緣說名大乘。佛告海意菩薩言。汝當諦聽。我今為說。海意。當知有一種法。攝受大乘。何等為一。謂不忘失大菩提心。復不放逸。海意。復有一法。攝受大乘。謂信所作。悉墮業報。復有一法。謂起正見。於緣生法。不相違背。復有一法。離愛非愛。於一切眾生。起平等心。復有一法。隨住大慈。而自救度。復有一法。起大悲心。不著己樂。復有一法。希求佛身。隨念於佛。復有一法。依法真修。隨念於法。復有一法。住不退轉。眾中隨念於眾。復有一法。蠲除一切煩惱。隨念於捨。復有一法。常不忘失菩提心。故隨念於戒。復有一法。住清淨法。隨念於天。復有一法。隨住利樂。令他歡喜。復有一法。住堅固意。極善樂欲。復有一法。起歡喜心。為一切眾生。施作解脫。復有一法。從甚深法。如理出生。勤求正法。復有一法。不以財利之心。而行法施。復有一法。於聽法者。作病人想。復有一法。於所說法。如良藥想。復有一法。已說法者。如醫王想。復有一法。常行衛護。令法久住。復有一法。令三寶種。不斷不絕。復有一法。無貪相續。常生喜足。復有一法。捨諸所有。不起愛著。復有一法。雖自守戒。而常將護。諸破戒者。復有一法。諸

惡作者。不觀彼過。而住於忍。復有一法。諸善作者。現起饒益。而住於忍。復有一法。於背恩者。起悲愍慧。復有一法。於知恩者。起恭敬悲。復有一法。於無智者。不起慢心。復有一法。於有智者。隨彼受學。復有一法。深固善根。心無厭捨。復有一法。於諸善法。心常隨轉。復有一法。無諂曲。故三戒清淨。復有一法。於說法者。愛敬承事。如師尊想。復有一法。捨諸外道。文籍善聽。正法。復有一法。修諸善根。雖復艱苦。於生死中。亦不疲懈。復有一法。於現住世。及已涅槃。諸佛如來。承事供養。而無厭足。復有一法。與諸眾生。為不請友。復有一法。以無依無取。無著之心。修四攝法。復有一法。了知在家。諸過失。已常樂出家。復有一法。於正士之業。常自開發。復有一法。所作決定。住菩提道。增修勝行。復有一法。於同住大乘者。不生惱恚。復有一法。教授菩提心法。不生疲懈。復有一法。善護祕密法。使不流散。復有一法。常當勤求法工。巧智。復有一法。以真實語。建立法幢。復有一法。所發誓願。當令畢竟。復有一法。以無變悔心。鈞行布施。復有一法。常當覺了諸魔事業。復有一法。常應發起離慢智業。復有一法。遠於知識。樂居寂靜。復有一法。離增上慢。及貢高心。不起他謗。復有一法。雖復了知諸煩惱已。而亦隨順世間行相。復有一法。淨命自資。離諸貪染。復有一法。深固相應。而常宴坐。復有一法。雖復多聞。而常寂定。復有一法。如理正修。瑜伽行地。復有一法。如實伺察。空境界法。復有一法。於其利衰。心無高下。

復有一法怖畏憤鬧獨處園林復有一法若得法利與他同分復有一法善解四聖諦智復有一法於諸智法而無祕惜復有一法為未學者成辦學故心無高勝復有一法若得若失信業報故不生熱惱復有一法恭敬聽法之者善為說法復有一法於親友中離諸貪愛於一切眾生起平等心復有一法於說法師所不起諂心而常讚歎復有一法以調順心故荷擔一切眾生復有一法於諸波羅蜜多相應勤求復有一法精進長養菩提道行復有一法建立信根令無動轉復有一法於國城中不空受食復有一法積集七種聖財而不匱乏復有一法內意真實安固命根復有一法以方便善巧成熟眾生復有一法行法施故而善攝法復有一法離諸諍論說最上法復有一法以無所得心聽受正法復有一法離沙門垢故而成沙門復有一法以無染愛心入王城聚落復有一法常當伺察過失善護一切眾生復有一法棄捨世間諸雜藝者復有一法於善知識所常當誠實復有一法自心清淨已起智復令一切眾生心得清淨復有一法無虛假故內意清淨復有一法趣向最勝道故深心清淨而此一法善作勝業方便清淨復有一法福清淨已諸相清淨復有一法智清淨已煩惱清淨復有一法眾生清淨已剎土清淨復有一法雖觀無相而善迴向復有一法修隨順忍復有一法於三解脫門常當伺察修習出離復有一法住無所住復有一法證漏盡智神通遊戲復

有一法住於止觀所作成辦得明解脫復有一法勤修方便所攝之慧復有一法住三界輪得菩提場莊嚴復有一法謂一切法平等現成正覺復有一法攝受大乘謂一切法自性無性無生無起如是知已即得無生法忍海意此之一法而能攝受大乘如是等一法攝受大乘已餘諸攝受依止而悉捨離復次海意有二種法於大乘中能多作何等為二一者於佛法中生淨信解二者不樂聲聞緣覺乘法有二種法於大乘中而極難作何等為二一者自解脫已善護未解脫者二者隨為彼說解脫之法復有二法多作一者常不壞滅大菩提心二者伺察眾生善為建立復有二法難作一者觀菩提心猶如幻法二者觀一切眾生皆悉無我復有二法多作一者心無厭離二者所修方便而不虛假復有二法難作一者內心清淨而為根本二者無作無不作故修諸福行復有二法多作一者勤修善根方便二者所修方便而令畢竟復有二法難作一者無戲論故而修方便二者所修方便住畢竟故其心寂靜復有二法多作一者深心趣向勝道二者於最勝法中作最勝所緣復有二法難作一者說悔自罪二者出離他罪復有二法多作一者捨諸所有二者不求果報復有二法難作一者起平等心而行捨捨二者善能迴向復有二法多作一者護戒無缺二者不求生天復有二法難作一者於毀戒者起悲愍心二者自具戒德不作貢高復有二法多作一者善樂於忍

二者迴向菩提復有二法難作一者捨離高心二者尊敬忍辱復有二法多作一者發起精進求諸善法二者於諸善根生歡喜心復有二法難作一者身心寂靜二者心離依著復有二法多作一者積集禪支二者心業調暢復有二法難作一者不著禪味二者不厭欲界復有二法多作一者勤求正法二者常生法欲復有二法難作一者伺察於法二者於法寂定復有二法多作一者親近善友二者於師長所增加尊重復有二法難作一者專勤承事二者善言隨順復有二法多作一者於時非時而常請問二者隨所得義領納於心復有二法難作一者修義智二者修法智復有二法多作一者聞財無厭二者聞慧無厭復有二法難作一者伺察深固之法二者遠離不深固法復有二法多作一者如理為他說法二者於聽法者起悲愍心復有二法難作一者於法不吝二者不以財利之心為他說法復有二法多作一者止息外聽二者攝受諸心復有二法難作一者息除五蓋二者修七覺分復有二法多作一者獲得歡喜二者喜受相應復有二法難作一者知法知量二者知自境界復有二法多作一者信於業報二者善修勝行復有二法難作一者解了諸非業報二者增長一切善法復有二法多作一者出誠實言二者不誑聖人復有二法難作一者如說能行二者不壞佛眼復有二法多作一者身業清淨二者離三不善復有二法難作一者觀身猶如影像二者觀如草

木瓦礫復有二法多作。一者語業清淨。二者離語四過。復有二法難作。一者解悟不可說法。二者智了諸聲猶如對響。復有二法多作。一者心業清淨。二者遠離貪瞋邪見。復有二法難作。一者內心寂止。二者外無所行。復有二法多作。一者修慈心觀。二者於諸眾生起平等心。復有二法難作。一者心如虛空清淨無垢。二者自度度他而善迴向。復有二法多作。一者常不厭離大悲之心。二者勤修善根而無懈倦。復有二法難作。一者伺察無生。二者善護出離。復有二法多作。一者游戲法園。二者除厭離心。復有二法難作。一者圓滿寂默之法。二者未具法者而令修行。復有二法多作。一者捨離愛染。二者斷諸損害。復有二法難作。一者修於捨行。二者觀察眾生而無艱苦。復有二法多作。一者修念佛觀。二者住於無念而起念心。復有二法難作。一者觀於法身。二者成辦諸相好身。復有二法多作。一者修念法觀。二者成辦諸眾生法。復有二法難作。一者伺察離貪。二者於其貪行眾生起大悲心。復有二法多作。一者隨念諸菩薩眾。二者歸向不退轉眾。復有二法難作。一者觀察無為。二者護得果者。復有二法多作。一者隨念於戒。二者常不忘失大菩提心。復有二法難作。一者伺察無加行戒。二者攝受將護破戒眾生。復有二法多作。一者隨念於捨。二者捨己不生變悔。復有二法難作。一者蠲除己之煩惱。二者為眾生說斷煩惱法。復有二法多作。一者隨念於天。二者不求生天。復有二法難

作。一者住正念慧。二者散亂心者令住念處。復有二法多作。一者增修福行。二者增修智行。復有二法難作。一者善修無加行智。二者於諸福行不生厭離。復有二法多作。一者超越諸著。二者於諸愛著悉能解脫。復有二法難作。一者極善樂欲。二者不生詭誑。復有二法多作。一者知恩。二者報恩。復有二法難作。一者斷除欲貪。二者於善法欲而無厭棄。復有二法多作。一者說悔諸罪。二者不作諸罪。復有二法難作。一者不起惡作。二者不起隨眠。復有二法多作。一者隨喜他福。二者自福無厭。復有二法難作。一者於一切罪起盡滅智。二者於一切福起長養智。復有二法多作。一者勸請諸佛。二者護持正法。復有二法難作。一者雖知法界本無分別。二者智善分別說諸句義。復有二法多作。一者善解迴向。二者隨所迴向與一切眾生共之。復有二法難作。一者決擇無相。二者修諸有相。復有二法多作。一者雖觀於空。二者觀照眾生。復有二法難作。一者慧起悉無所樂。二者方便而有所樂。復有二法多作。一者希求善根。二者為諸眾生成辦善根。復有二法難作。一者修習無願。二者積集所生之智。復有二法多作。一者無著。二者無動。復有二法難作。一者無慢。二者愛樂。復有二法多作。一者樂居寂靜。二者領納寂靜功德。復有二法難作。一者修寂靜行。二者自度復度一切眾生。復有二法多作。一者少欲。二者知足。復有二法難作。一者省察己之煩惱。二者審觀斷除一切眾生煩

惱。復有二法多作。一者安定。二者伺察。復有二法難作。一者常省己過。二者不觀他過。復有二法多作。一者自離貢高。二者不起他謗。復有二法難作。一者觀我無我。二者觀眾生無眾生。復有二法多作。一者自常行施。二者容受他施。復有二法難作。一者出離輪迴。二者度輪迴中一切眾生。復有二法多作。一者勤求波羅蜜多。二者隨諸所求波羅蜜多如所說住。復有二法難作。一者得現量智。二者成辦他智。復有二法多作。一者不求世間名聞利養。二者勤求正法。復有二法難作。一者不饒益者為作饒益。二者已饒益者而令增極。復有二法多作。一者所作大慈而無邊際。二者所行大悲而無間斷。復有二法難作。一者已得度者而令證悟。二者未得度者而為濟度。復有二法多作。一者為諸眾生成就功德。二者無德眾生起大悲心。復有二法難作。一者不饒益者作饒益行。二者已作饒益而無異想。復有二法多作。一者常作身念處觀。二者身住清淨。復有二法難作。一者雖作身中身隨念觀。二者不與身俱起於尋伺及尋伺道。復有二法多作。一者常作受念處觀。二者於苦樂等受而無領納。復有二法難作。一者雖作受中受隨念觀。二者不與受俱起於尋伺及尋伺道。復有二法多作。一者常作心念處觀。二者心住清淨。復有二法難作。一者雖作心中心隨念觀。二者不與心俱起於尋伺及尋伺道。復有二法多作。一者常作法念處觀。二者常起決擇法智。復有二法難作。一

者雖作法中法念處觀。二者不與法俱起於尋伺及尋伺道。復有二法多作。一者已生諸不善法悉令除斷。二者已生一切善法而能守護。復有二法難作。一者未生諸不善法防令不生。二者未生一切善法當令生起。復有二法多作。一者常修欲勤心慧四種神足。二者應以神足得度眾生而善度之。復有二法難作。一者雖獲無加行神變。二者不動法界能於一切佛刹之中顯諸神應。復有二法多作。一者自所得信而無動轉。二者諸未信者令具於信。復有二法難作。一者自心而無雜染。二者染心眾生令得清淨。復有二法多作。一者發起諸精進根。二者安住念根不生散亂。復有二法難作。一者決擇善觀諸精進根。二者不著空相而起於念。復有二法多作。一者於定慧根勤修諸行。二者所修諸行不生疲懈。復有二法難作。一者智無所行。二者成熟眾生而有所行。復有二法多作。一者於諸煩惱觀離煩惱。二者已生煩惱勤求出離。復有二法難作。一者一切法不和合本離煩惱故。二者於三界和合。為斷一切眾生諸煩惱故。

佛說海意菩薩所問淨印法門經卷第十一

西天譯經三藏朝散大夫試鴻臚卿傳  
梵大師賜紫沙門臣法護等奉 詔譯

復次海意。復有二法於大乘中能多作。一者精進修七覺支。二者深心說覺支法。復有二法難作。一者不住盡智。二者無生智忍。復

有二法多作。一者善行正道。二者善知非道不行。復有二法難作。一者修向道智。二者安立正道。復有二法多作。一者隨順緣生之法。二者離二邊見。復有二法難作。一者善知一切眾生染因染緣。二者善知一切眾生淨因淨緣。復有二法多作。一者覺知魔事。二者遠離魔業。復有二法難作。一者出離諸魔。二者令魔隱伏。復有二法多作。一者已盡之法復無所盡。二者無盡之法而不可盡。復有二法難作。一者本來無盡。二者諦觀諸法剎那破壞。復有二法多作。一者從初發心而即伺察大菩提場。二者伺察菩提場故不樂餘乘。復有二法難作。一者初發心時。是即出生菩提場因。二者雖復起諸善心而無取著。復有二法多作。一者生死相續之者為斷諸結。二者善根相續之者。令其發心不生厭離。復有二法難作。一者若有方分若無方分。一切善根悉用迴向無上菩提。二者雖復迴向菩提。起心諦觀。皆如幻法。復有二法多作。一者令諸眾生普觀菩提。二者已觀菩提眾生令觀解脫。復有二法難作。一者伺察菩提平等故眾生亦平等。二者成熟眾生精進無倦。復有二法於大乘中能多作。一者發心如理決擇一切善法。二者發起大悲之心。以諸眾生置涅槃道。海意。此之一法於大乘中能多作。復有二法於大乘中而極難作。一者無生而生。二者無起而起。海意。此之一法於大乘中而極難作。復次海意。有三種法增長大乘。何等為三。一者發菩提心增修善根。二者為善知識之所

攝受不生疲懈。三者建立大悲而無退轉。此之三法增長大乘。復有二法增長大乘。何等為三。一者勤修勝行。二者伺察諸行。三者於勝行中為諸眾生而善成辦。復有三法。一者攝止慳心。二者廣行施捨。三者迴向菩提。復有三法。一者自集淨戒。二者將護破戒之人。三者迴向菩提。復有三法。一者心無障礙。二者忿恚眾生令得清淨。三者迴向菩提。復有三法。一者精進無倦。二者懈怠眾生而能將護。三者迴向菩提。復有三法。一者從禪定生。二者不著禪定。三者迴向菩提。復有三法。一者勤求多聞。二者如聞伺察。三者迴向菩提。復有三法。一者起於緣眾生慈。二者起於緣法之慈。三者起於無緣之慈。復有三法。一者自所作故起於悲心。二者為他作故起於悲心。三者離二邊故起大悲心。復有三法。一者勤求自利之智。二者勤求利他之智。三者發勤精進二利圓滿。復有三法。一者過去已盡之智。二者未來未至之智。三者現在住法界智。復有三法。一者於其正定眾生起方便慈。二者於其不定眾生起解脫慈。三者於其邪定眾生起大救度慈。復有三法。一者得樂受故身業調暢。二者善護他故語言甘美。三者行正直故心業堪任。復有三法。一者雖修不淨之觀。而於貪行眾生類中不生厭離。二者雖修慈心之觀。而於瞋行眾生類中不生厭離。三者雖修緣生之觀。而於癡行眾生類中不生厭離。復有三法。一者利益修勝行故。二者歡喜常知足故。三者清涼永無熱惱故。復有三法。一者任持

所聞。二者總持文句。三者入於智聲前後際斷故。復有三法。一者攝集七聖財故而不匱乏。二者法施無障礙故能行大捨。三者所有財利鈞眾分故常得大富。復有三法。一者誠諦入勝義諦故。二者真實無虛誑故。三者如常無變異故。復有三法。一者自知今我云何。二者知諸眾生當何施作。三者知時解時非時諸分位故。復有三法。一者蘊法蘊平等。二者界法界平等。三者處觀如空聚。復有三法。一者不壞因果。二者能善長養諸緣。三者和合互相涉入。復有三法。一者不違背佛。二者不毀謗法。三者不輕慢眾。而常尊重恭敬承事。復有三法。一者止息於貪。二者遠離於瞋。三者開曉於癡。復有三法。一者入世俗諦。二者真實說相。三者勝義諦無住。復有三法。一者於諸眾生不起輕慢。二者於阿羅漢常生尊敬。三者不為煩惱之所制伏。復有三法。一者不染欲界。二者不樂色界。三者不著無色界。復有三法。一者於衰譏毀苦其心不下。二者於利稱譽樂其心不高。二者不染世之八法。猶如山王安固無動。復有三法。一者隱密諸根。二者善解諸結。三者善調其心。復有三法。一者建立地位功德。二者能離地位過失。三者於地地中善能勝進。復有三法。一者內心起勝上智。二者深心起差別智。三者方便起安立智。復有三法。一者定清淨已得增上戒學。二者慧圓滿已得增上心學。三者解脫圓滿已得增上慧學。復有三法。一者樂受斷除貪愛。二者苦受斷除瞋恚。三者不苦不樂受斷除

無明。復有三法。一者雖轉於因而無加行。二者雖轉煩惱而無分別。三者雖轉三界而無願求。復有三法。一者決擇於空遠離諸見。二者決擇無相止息尋伺。三者決擇無願三界寂滅。復有三法。一者眼空。二者色境離性。三者眼識無住。復有三法。一者耳空。二者聲境離性。三者耳識無住。復有三法。一者舌空。二者香境離性。三者舌識無住。復有三法。一者身空。二者觸境離性。三者身識無住。復有三法。一者意空。二者法境離性。三者意識無住。復有三法。一者密修於戒。二者善護於定。三者決擇於慧。復有三法。一者修念任持正法。二者修慧深固伺察。三者修行覺了行義。復有三法。一者隨住聲聞聖諦聲中說解脫法。二者隨住緣覺緣生法中說解脫法。三者隨住菩薩六波羅蜜諸勝行中說解脫法。復有三法。一者捨捨謂捨一切珍寶。二者大捨謂捨妻子奴婢眷屬。三者極捨謂捨身分頭目手足。復有三法。一者護持正法。二者護持諸說法師。三者護持大乘之法。復有三法。一者不令生死相續。二者覺悟生死過失。三者遠離生死罪業。復有三法。一者無蓋障心聽受正法。二者無隨眠心而常宴坐。三者以出離心能正修行。復有三法。一者所聞依義。二者觀察依智。三者解脫依法。復有三法。一者多聞樂居寂靜。二者住寂靜已深固作意。三者深固作意相應而能覺了諸法平等。復有三法。一者恭敬智者。二者請問多聞。三者護修

定者。復有三法。一者不以得利之心而行法施。二者於聽法者慈心攝受。三者起一切智心現前所作。復有三法。一者心平等故眾生平等。二者無種種性故諸法平等。三者智平等故諸佛平等。復有三法。一者智知三世平等。二者慧解三解脫平等。三者了悟三界平等。復有三法。一者善觀諸行無常亦復是苦。二者善觀諸法無我。三者善觀涅槃寂靜。復有三法。一者誓願真實住畢竟故。二者所聞真實如理修行。三者三摩地真實發生勝慧。復有三法。一者已作之罪而不覆藏。二者未作之罪防令不起。三者現所有罪悉令悔滅。復有三法。一者遠離惡作。二者遠離隨眠。三者遠離疑惑。復有三法。一者樂居寂靜。二者離於貪愛。三者起善法欲。復有三法。一者住深法忍。二者說種種法。三者得一切處通達辯才。復有三法。一者所聞決定總持。二者得佛加持辯才。三者諸所說法賢聖攝護。復有三法。一者從初發心坦平如地。二者諸行畢竟諸行相續。三者雖轉諸想而住不退轉地。復有三法。一者圓滿聞所成忍。二者思所成忍而不流散。三者獲得無生法忍。復有三法。增長大乘。一者方便與慧和合修諸道行。二者大慈大悲和合成熟眾生。三者精進不放逸和合護持正法。海意。此之二法而能增長大乘。復次海意。有四種法於大乘中而為障礙。何等為四。一者惡聞。所謂尋求外道文籍。二者於其六波羅蜜菩薩藏正法不樂聽受。三者增上慢心起諸魔業。四者業障隨逐毀謗正

法海意此之四法於大乘中而為障礙復有四法於大乘中而為障礙何等為四一者貪愛二者瞋恚三者愚癡四者煩惱增盈不求善法功德復有四法一者嫉他得利二者詭曲親近諸說法師三者起點利慧誑行饒益四者以不實心而作欺誑復有四法一者於善友所起惡友想二者於惡友所起善友想三者於非法中起正法想四者於正法中起非法想復有四法一者常起慳染之心二者見乞巧人即起損害過失之心三者施已生變悔心四者起背一切智心復有四法一者欲心行施二者過失心行施三者怖畏心施四者愚癡心施復有四法一者為求名稱故施二者為求美譽故施三者為求善聲故施四者為求讚歎故施復有四法一者以世俗情義故施二者有所為事故施三者不顯明施四者不自手施復有四法一者以麁物施二者不貴重施三者不恭敬施四者增上慢施復有四法一者以利刀施二者以毒藥施三者不軌法施四者損害心施復有四法一者於持戒人生瞋恚心二者於破戒人起彼損害不將護心三者自所修戒而常雜亂四者於說戒人起殺害想復有四法一者好求艱苦財利二者若得法利不鈎他分三者不欲他人所得利養四者於自得利不生知足復有四法一者身曲非威儀道二者語曲所言不實三者心曲欲作諸罪四者一切處曲不以淨命而資養故復有四法一者於其同住大乘之者起瞋恚心二者不能覺了諸魔事業增上慢故三

者聞非所說而即喜行四者聞說諸善功德而生惱意復有四法一者高慢正法不能親近二者於說法師不起尊重三者於其父母師長及親教師不生歸敬四者身心堅獷諸所起行常生違背復有四法一者舉揚自德二者隱覆他德三者我慢熾然四者堅猛瞋恚復有四法一者懈怠二者昏沈三者不正順四者執著復有四法一者不調伏二者不寂靜三者不隱密四者不柔善復有四法一者少聞入於國城聚落二者不具戒蘊而求利養三者不護身儀入女人舍四者不住等引之心解入一切眾生根性復有四法一者不能勤修四攝之法二者棄捨成熟眾生三者毀謗正法不作護持四者於說法人而生嫉惱復有四法一者愚癡常生多欲二者瞋恚樂作諸罪三者貪愛不生喜足四者求利心常無厭復有四法一者不信而常掉舉二者親近惡友不厭捨罪三者懈怠滅沒善法四者放逸所作善根而皆喪失復有四法一者不能內觀察故而常無慚二者慧解不明曉故而常無愧三者與無間業等故而不知恩四者雖於他人少行善利而自伐滅返生誣謗復有四法一者瞋二者忿三者恨四者害復有四法一者虛誑諸聖二者不護諸聖三者輕慢施主四者於阿羅漢起增上慢復有四法一者身業不能清淨二者語業不能善護三者心業雜染四者於大乘中而生疲倦復有四法一者於眾聚中而起兩舌二者於師長阿闍梨所而發惡語三者於諸來求者而興

綺語四者虛誑人天復有四法一者不護戒蘊二者不越他世三者散失善根四者破壞長養勝行復有四法一者於大眾中起強勝心二者於集會所執高慢心三者常出惡言欲離於罪四者以雜亂語說世間典復有四法一者以不勤行心居寂靜處二者多損害心居憤鬧中三者不種善根起有福想四者竊菩薩名求利活命復有四法一者心不柔順二者其心麁獷三者心不調伏四者於諸眾生起艱苦心復有四法一者憍恃持戒二者憍恃多聞三者憍恃住阿蘭若四者憍恃頭陀功德復有四法一者計我為勝二者計法為勝三者以少善根計為高勝不迴向菩提四者先修大乘之行中樂聲聞緣覺乘法復有四法一者執著於身二者執著於心三者執著於戒四者不向勝道復有四法一者親友家乞於非家用二者追求利養自謂清淨而復喜見破戒之者三者耽樂俗舍四者於具戒人而生瞋恚艱苦所作起諸纏縛復有四法一者多作事二者多求利三者多語言四者多知識復有四法一者我見取著於我二者眾生見取著眾生三者斷見取著無作四者常見取著身命復有四法一者雖於諸事有所發起二者既發起已不能攝持三者不攝持故而生疲懈四者以疲懈故乃起怖畏復有四法一者不修昇進地地之智二者不能善修禪定三者棄捨眾生勝慧不行四者雖修願及方便而起有得之想復有四法於大乘中而為障礙一者法障隨眠而根性鈍

二者業障隨眠於諸善根而不勤行。二者煩惱障隨眠。三蘊隨轉。四者魔事隨逐忘失菩提心。海意如是等四法於大乘中而為障礙。佛說海意菩薩所問淨印法門經卷第十一

### 佛說海意菩薩所問淨印法門經卷第十一

西天譯經三藏朝散大夫鴻臚卿傳梵大師賜紫沙門臣法護等奉 詔譯

世尊說是攝受大乘等諸法時。會中四萬四千眾生及千天人。悉發阿耨多羅三藐三菩提心。二萬八千菩薩得無生法忍。而此三千大千世界六種震動。有大光明廣照十方。有千天人處于空中。言音互發喜躍回旋。復雨殊妙天諸寶花。鼓吹歌音奏天妙樂而為供養。以妙偈詞而讚嘆曰

如是最上大法藏 如來今日親開示

久已安住大悲心 為諸眾生明顯了

說此偈已。又作是言。世尊。若人於此如來所說大法寶藏。而能受持極少分者。是人速能解脫一切地獄恐怖。次第當轉無上法輪。世尊。譬如有人去彼州城聚落不遠。見地伏藏中有無盡珍寶充滿。是以具利益心。故見已即時詣州城中。語諸人言。汝等善來。汝若欲求諸珍寶者。我知方處。當示於汝。無盡伏藏。世尊。彼州城中有一類人。雖聞其言而不信受。有一類人信其所說。即同其人詣伏藏所。隨自力能恣取其寶。如其智量得寶而還。然彼伏藏取而無盡。亦無分別此人我與彼人不與。此人應取彼不應取。何以故。而是伏藏

無分別故。世尊。諸佛所說大法寶藏亦復如是。佛於阿僧祇俱胝那庾多百千劫中。積集如是無上廣大妙法寶藏。既積集已。詣菩提場成正覺果。後於波羅奈國鹿野苑中轉大法輪。今日世尊。又復轉此集會正法。開示無上大法寶藏。而佛世尊以無取心。於諸眾生起大悲行。作利益事。諸不知者。以妙梵音普遍告諭諸天及人阿修羅等。而表示言。汝等來此受持無上廣大法寶。此法能盡生老病死諸苦邊際。能施一切無盡妙樂。世尊。或有一類不具於信愚癡之人。於此正法不生勝解。復不正順。不能分別。故不生信。或有一類具信之者。於此正法能善分別。而生勝解。復起正順。以能分別。故深生淨信。是人乃能於佛如來。大法寶藏。隨力堪任。取其法寶。自取寶已。復令他人於彼諸乘解脫法中。而生信解。或有樂住聲聞乘性。或有樂住緣覺乘性。或有樂住阿耨多羅三藐三菩提者。然佛如來無上最勝大法寶藏。而無窮盡。亦無分別。又復世尊。今此無上大法寶藏。如是廣大開發顯示。而諸眾生於此法寶總略。乃至極少分中。有不能取者。是人不得寶故。於長夜中行三惡趣。無有窮盡。世尊。若復有人於此無上大法寶藏。少略。乃至或能受持一四句偈者。是人具足七種聖財。而不貧匱。何況有能於此廣大集會正法。少略一品信奉受持。或復二三四五。若二十七十品。乃至終畢能受持者。是人所獲功德不可稱計。何以故。今此法門不離菩提心故。為諸眾生起大悲心。所逼切故。是故

若人能起淨心受持讀誦。為他說者。應知彼人得受阿耨多羅三藐三菩提。當坐道場降伏諸魔。於大乘中得大神通。爾時世尊讚諸天子言。善哉善哉。諸天子眾。汝等善說。當知善能於此正法受持讀誦。而生勝解。如理修行者。是人建立一切語言勝妙功德。是人得至一切智頂。復知是人廣為一切世間作智慧光。普遍照耀。詣菩提場。不久當成阿耨多羅三藐三菩提果。何以故。由能乘御此大乘故。爾時世尊重說頌曰 建立此最勝廣大諸佛乘 如虛空光明 越諸世間故 出離三有已 往詣菩提場 無彼有著心 已離諸繫著 俱胝劫積集 廣大清淨說 布施調止門 令內心深固 由戒止諸罪 身心得清淨 離諸怖畏心 往詣菩提場 平等心及意 容受諸眾生 超勝於餘乘 謂諸下乘等 趣此大乘法 令眾生歡喜 高建大法幢 神足御如馬 聞精進相續 禪定為床坐 忍辱力隨得 大智慧灌頂 摧伏諸外眾 破諸魔軍已 詣淨菩提場 趣向大乘法 慈心為甲冑 怨惡不能壞 行堅固大悲 趣向深法理 四禪四神足 乘四無量行 調御菩提心 不捨諸正道 十方無邊際 一切眾生界 悉於此大乘 乘御而修進 無苦亦無樂 非減亦非增 最上佛乘中 具如是神力 修行四念處 及彼四正斷 四神足亦然 五根五力等 如佛所讚說 具七覺支寶 遊行八正道 往詣菩提場 寂止諸煩惱 圓具法光明

①三蘊。於化地部別萬法為三種：1.一念蘊者，剎那生滅之法也。2.一期蘊者，人自生至死間相續之法也，五根等屬之。3.窮生死蘊者，窮生死而至金剛喻之前

破一切暗塵	顯出於三有	神力普能召
帝釋梵王等	汝等各善御	此無比大乘
諸波羅蜜多	謂施戒及忍	精進禪定門
勝慧智神力	及彼方便行	所攝真實願
縱百千魔軍	此悉能摧伏	毀戒諸眾生
勤造諸罪業	高勝諸菩薩	集多種功德
若所起諸心	菩提心廣大	能御大成人
彼悉能觀察	所有世間典	種種義及行
乃至出世間	真實諸善法	有學及無學
緣覺諸聖人	住於佛乘者	悉入彼彼門
若種種煩惱	及種種心行	諸苦惱眾生
輪轉有為界	住於佛乘者	菩薩悉能觀
令彼等息苦	趣向畢竟乘	又諸懈怠人
劣弱無勢力	而不能運心	盡眾生苦際
由聞大乘已	彼心生恐怖	唯求自樂因
不作利他行	若明解大力	有大智菩薩
精進力具圓	眾生常利益	行大悲方便
內心性清淨	由乘最上乘	故彼心歡喜
普盡諸世間	無邊種種行	上中下等差
根性及意樂	乘此最上乘	具大智菩薩
剎那能遍知	諸眾生心行	身得妙相好
莊嚴諸身分	語出悅美音	一切聞皆喜
心意得清淨	具禪定神通	由乘最上乘
獲廣大功德	此最上佛乘	三界遍聞故
乃至一切佛	聖佛眼不斷	增長最上眼
謂法眼熾然	超越三界眾	即諸阿羅漢
此乘淨微妙	不墮穢土中	菩薩御此乘
剎那見諸佛	十方界往已	無疲亦無減
觀此無比乘	有如是神變	御佛乘大士

遍行諸世間	超勝及比倫	求之俱不得
世間一勇猛	菩薩大威神	由乘最上乘
能怖魔軍眾	獲色力威勢	及得廣大富
或帝釋梵王	輪王護世等	乃至天及人
得是三界樂	由乘最上乘	妙樂悉圓具
菩薩心無高	而亦復無下	能施諸所愛
施已不求報	以歡喜慈心	亦施於頭目
由乘最上乘	迴向菩提故	菩薩持淨戒
或具於梵行	禁戒淨光明	煥耀踰日月
色相及富盛	悉無所希求	由乘最上乘
為救度眾生	菩薩聞惡言	不忿亦不恚
正使碎其身	亦護諸群品	此身即易得
法王值極難	由乘最上乘	得此忍清淨
菩薩於無邊	百千劫已來	循環惡趣中
流轉生死界	發大精進力	為救度眾生
由乘最上乘	精進力成就	菩薩得寂靜
柔軟勝妙樂	知定功德法	慈眼視眾生
是中無少分	味著禪定樂	唯思念希求
得見於諸佛	菩薩知諸法	因緣所生空
我法及眾生	彼皆無所得	諸見善清淨
勝慧調伏心	由乘最上乘	此妙慧清淨
所有四聖諦	四無量四定	及五種智通
四無礙解等	於四攝法中	法施為最上
如是功德門	皆從佛乘出	所有十力等
無邊諸佛法	佛人中師子	說法若其吼
眉間及口中	無見頂放光	由乘最上乘
菩薩不難得	諸佛有三種	最勝大神通
調伏於世間	照明諸心意	諸佛所說法
其果利不虛	由乘最上乘	疾速皆獲得

佛語義相應	無染無過失	緊那羅梵音
軟美復悅意	普攝諸世間	眾生言音等
聞佛妙音聲	一切皆歡喜	菩薩非久獲
如是佛言音	等空佛剎中	一切皆表示
普遍悉能聞	法義相應語	眾生聞皆樂
煩惱悉蠲除	假使以神力	能至虛空邊
十方海水中	亦能知其量	無邊眾生行
剎那心尚知	唯佛最上乘	功德說無盡
爾時世尊復告海意菩薩摩訶薩言海意是	故當知若有菩薩欲於如是廣大正法密作	護持令法久住自心潔白已於他眾生及補
特伽羅所有一切上中下根能遍知者應當	受持如是句義所謂門句印句及金剛句得	受持已如義解了以慧相應最勝方便如理
伺察海意何者名為門句所謂諸施設門表	示一切法分別義阿字門表示一切法無生	義波字門表示一切法勝義諦那字門表示
一切法了知名色義捺字門表示一切法調	伏寂靜義娑字門表示一切法出過諸著義	多字門表示一切法隨住真如義迦字門表
示一切法了達業報義又娑字門表示一切	法平等無差別義摩字門表示一切法大悲	義識字門表示一切法最極甚深難徹源底
義惹字門表示一切法超越老死義馱字門	表示一切法法界無分別義設字門表示一	切法圓滿奢摩他義佉字門表示一切法虛
空煥明義又字門表示一切法普盡無生義	倪野字門表示一切法智無著義他字門表	示一切法善解處非處義塞迦字門表示一